

都虞司四卷

總管內務府現行則例

總管內務府現行則例³

都虞司一冊 定價陸角

版權所有

民國二十六年二月出版 300

八九

勘誤表

葉數	行數	誤	正
一八	五	應徵銀糧	應徵錢糧
二五	八	每打捕鴉鶻	每年打捕鴉鶻
二九	二三	分列等第	分別等第

欽定總管內務府現行則例都虞司

目錄

卷一

額設員役

補授官員

三旗額設護軍人員

三旗額設驍騎人員

設立內務府前鋒營護軍事宜

圓明園三旗護軍並驍騎人員

三旗拴養官馬

烏鎗營兵丁操演

文武官員食俸條例

賞給兵丁等米石銀兩

賞給內務府官員飯銀

賞給茶膳房人員馬錢

添設各項兵丁

武官軍政

挑取護軍披甲人等

咨領大臣統領養廉

領借庫銀

隨圍護軍統領等應得銀兩

隨圍官員等馬匹折價

卷二

轉行錢糧米石

領取公費紙張筆墨炭斤等項

官員人等應賠應交各項銀兩

一〇

一〇

一〇

一一

一二

一二

一三

一三

一四

一六

一六

一六

革退逃走兵丁交回銀米	一七	盛京聽差馬羣	二四
承催錢糧人員賞罰事宜	一七	投充打牲新丁交納折價定例	二四
參領佐領隨甲	一八	徵納烏拉蜂蜜松子牲丁錢糧	二五
稽察兵丁等借放重利	一八	查比牲丁定例	二五
守制定例	一九	挑補鷹手	二六
除派隨從人員	一九	裁減官馬	二六
除派署副參領人員	二〇	鈐用印信	二六
稽察進班員弁	二〇	接收丁冊	二六
看守各行官員弁陞遷	二三	恩賞事宜	二七
盛京三旗人員陞遷	二三	查銷冊稿	二七
盛京等處牲丁交納定例	二三	卷三	
打牲烏拉人員陞遷	二三	除派執燈人員	二八
投充打牲新丁定例	二四	招募書吏	二八

移會陞遷事宜

二九

應用蘇拉人役

三三

咨送考語

三〇

三旗參領事宜

三三

咨送考試

三〇

看守湯泉等處行宮弁兵錢糧

三三

議敘事宜

三〇

領取內班弁兵飯食銀米

三四

咨取看守護送兵丁

三〇

整齊防火器具

三四

呈送逃人

三〇

賞給熱河總管養廉

三四

咨送查覈

三一

賞罰功過

三四

隨任子弟挑差

三一

官地被災定例

三五

親老改補事例

三二

旗員告假

三五

成造担簦

三二

新定火班章程

三五

出口人員領票

三三

卷四

恩豐倉值年官員

三三

侍衛應得馬錢

三九

除派看賞人員

三三

事故兵丁扣抵餉銀

三九

酌給水手子弟錢糧

四〇

新建營改爲精捷營演習章程

四六

巡幸監射布靶

四一

旗人命名

四七

引見事宜

四一

考取筆帖式庫使等條例

四七

鄉會試事宜

四二

降調官員加級紀錄

四八

隨甲錢糧

四二

移會事宜

四八

遞奏事宜

四三

熱河園庭裁撤弁兵

四九

議奏事宜

四三

禁飭服色

五〇

滿洲臣僕俱應通曉清文

四三

考察官員

四四

欽差大臣不准隨帶現任大員子弟

四四

摺奏書稱

四五

責令筆帖式繕寫清文

四五

武舉選用門衛千總事宜

四五

欽定總管內務府現行則例

都虞司卷一

額設員役

都虞司職掌三旗禁旅訓練遣調及漁獵等事現設郎中二員員外郎五員主事一員委署主事一員筆帖式二十七員催長四名副催長四名領催栢唐阿十一名寫檔案披甲人六十名催辦牲丁錢糧披甲人十六名蘇拉一名

補授官員

雍正元年奏准旗鼓佐領下官員不准管理滿洲佐領 七年奉旨內管領下官員不准補授佐領欽此 是年奉旨嗣後凡引見補授官員及派差官員著於綠頭牌上繕寫補授何缺除派何差字樣欽此

凡武職官員自內務府護軍統領參領以下六品以上官員缺出照部例於月底截缺次月將應陞人員揀選帶領引見補授其盛京烏拉等處官員缺出以該處保送人文到京之日起定限三十日內帶領引見補授

凡烏拉總管缺出於在京之四品五品文武官員內揀選帶領引見補授

凡烏拉翼領缺出照該處保送人員內擬定正陪帶領引見補授餘剩者照例記名

凡世職官員缺出該參領呈明移咨各該旗將應襲人員帶領引見承襲

一護軍參領缺出於奉旨記名卓異副護軍參領擬爲一班俸深副護軍參領擬爲一班遇有缺出分班簡用論俸開列

一副護軍參領缺出於卓異護軍校委署參領擬爲一班俸深者擬爲一班遇有缺出分班簡用論俸開列

一護軍校委署參領缺出於卓異護軍校擬爲一班食錢糧年久者擬爲一班遇有缺出分班簡用論年開列

一護軍校缺出於護軍內揀選補放論年開列

一驍騎副參領缺出於六品以上文武官員內京察准爲一等並卓異者擬爲一班俸深散秩官員擬爲一班遇有缺出分班簡用論俸開列

一驍騎校缺出於各佐領下筆帖式領催栢唐阿項戴領催並無品級頭目等項人員內揀選補放論年開列

一高麗佐領缺出係卅襲佐領照例奏補

一高麗佐領下驍騎校缺出於本佐領下無品級頭目領催內揀選補放論年開列

一盛京驍騎校缺出照該處保送人員擬定正陪帶領引見補放餘剩者照例記名

一烏拉驍騎校缺出照該處保送人員內擬定正陪帶領引見補放餘剩者照例記名

一看守熱河行宮等處千總缺出照該處保送人員內擬定正陪帶領引見補放餘剩者

照例記名

一現任副護軍參領歷俸二年護軍校委署參領食現職錢糧二年護軍校食現職錢糧

十年護軍食護軍錢糧十五年方准陞補其應陞驍騎校各項人員俱以行走二十年

者方准補放

一議叙應陞之處列名人員與應陞人員一體論俸揀選錄用

一帶領引見人員除特題及補放護軍統領盛京佐領並佐領內管領不拘額數外其餘

一應引見人員每缺擬正一員擬陪一員帶領引見餘剩人員下次擬以前列此內遇

有緣事應行處分者照例停其陞轉

一護軍統領佐領盛京佐領缺出將奉旨記名京察准爲一等並卓異俸深五品以上文武各員出身履歷現任年分令該參領佐領管領造冊送都虞司以備缺出呈明揀選

一驍騎參領缺出應將京察准爲一等並卓異俸深之五品以上文武官員等呈明揀選

帶領引見

一揀選護軍參領並副護軍參領護軍校委署參領護軍校人員令各該旗護軍統領將奉旨記名卓異人員並將伊等歷俸食錢糧年分確實開送外仍將歷俸二年之副護軍參領食現職俸二年錢糧之護軍校委署參領食現職十年錢糧之護軍校食十五年錢糧以外之護軍等一併查送註冊

乾隆二十一年奉上諭噶爾錫等將記名領催黑達塞奏補黑格所出驍騎校之缺著照噶爾錫等所請將黑達塞坐補但此次人員俱係以補放驍騎校帶領引見記名之人視有缺出卽當坐補如每次俱待具奏始行坐補徒滋煩擾嗣後似此記名人員著由各該管將軍大臣處視有缺出卽行坐補將一年共坐補幾人之處於歲底彙報該旗轉奏欽此

是年奉旨避暑山莊總領所管處所繁多富貴管理不能周至且伊爲人亦覺柔懦

著將海保授爲避暑宮總領富貴作爲副總領此二缺卽著永遠爲例缺出照此補放欽此 是年奉旨熱河總領著作爲佐領職銜其副總領作爲郎中職銜欽此 二十三年奏准將朝鮮通官上三旗下五旗各定以六品者一員七品者一員八品者二員定爲額數下五旗通官缺出亦照上三旗之例該部帶領引見請旨補放 四十七年奉上諭鑾儀衛請轎校尉頭目內原有驍騎校二員著施恩校尉頭目內永得給驍騎校二缺著爲例欽此 嘉慶十三年定准嗣後應陞副參領之驍騎校亦照司庫六品庫掌歷現任俸六年方准陞用之例食現職錢糧及六年者列名揀選至各處保送陞用副參領各員仍請照前定准例食現職錢糧俸銀及十年者方准保送列名 十六年奉旨嗣後內務府人中式繙繹舉人仍在內務府用其中式繙繹進士人員著與八旗繙繹進士一體籤掣分部分行走欽此 十七年定准嗣後遇有副參領缺出將食現職錢糧及六年之驍騎校擬陞二缺後於各處保送食現職俸祿並食錢糧之護軍校等足十年人員擬陞一缺年分不符者卽行駁回不准入班 二十年六月奏准各處保入驍騎校班歷俸已滿六年者方准保入如經該管官員特保歷俸已滿三年者卽准保入其各項雜職人員俱於本

差行走十年方准陞用 二十四年五月奉上諭嗣後引見及射布靶滿漢官員其祖父係一二品大員者無論原任現任皆於籤內註明其兄弟現任一二品大員者亦於籤內註明欽此 道光二年四月奉上諭近來京外各官遇有遷擢皆於召見及接奉批摺後始換陞銜頂戴本非舊制嗣後陞任人員京官自奉有諭旨外官自接到部文後著即換用陞銜欽此 三年五月奉旨據綿志等奏世管佐領宜慶現在出缺族中並無襲替之人其母張氏呈請將伊姪張煦年過繼爲嗣覈與條例相符著准其過繼承祧其承襲之世管佐領著改爲公中佐領由該旗照例揀選帶領引見嗣後如有世襲旗人如過繼本族爲嗣方准其承襲世職其以另戶異姓親屬之人過繼爲嗣者不准承襲著八旗都統一體遵照欽此 二十八年三月奉旨嗣後揀選大門三等侍衛由上虞備用處藍翎長內有差務勤慎馬步箭俱佳者該管堂官於三旗內每旗各保一人共保三人同各旗護軍校驍騎校等一體揀選著爲例欽此

三旗額設護軍人員

現設護軍統領三員司鑰長三員護軍參領十二員副護軍參領十五員委署參領九員

前鋒委署參領六員護軍校九十九員前鋒護軍校六員護軍一千二百名內六品虛銜前鋒委署護軍校六名前鋒藍翎長十二名大營藍翎長十五名印務筆帖式三十名前鋒護軍一百二十名 乾隆三十六年十二月本府將三旗護軍參領等奏准賞給三品虛銜頂戴副護軍參領等賞給四品虛銜頂戴護軍校委署章京賞給五品虛銜頂戴俱准戴孔雀翎委署護軍校賞給虛銜金頂令戴藍翎辦理檔案之護軍每旗每甲喇各二名賞給虛銜金頂行走五年好者本營陞用再有能繙譯者呈送堂上監考以筆帖式錄用

凡三旗護軍內有年久行走好者每旗各保送二名入於補放驍騎校班內

凡藍翎長缺出將應放之委署護軍校擬定出具切實考語並當差年分開列名單由該營帶領呈回補放

凡護軍校缺出以藍翎長陞用三缺後印務筆帖式陞用一缺

三旗額設驍騎人員

現設驍騎參領十五員以郎中兼任驍騎副參領十五員滿洲佐領十五員高麗佐領二

員旗鼓佐領十八員內管領三十員副內管領三十員驍騎校三十五員頂戴領催六十五名領催一百九十五名披甲人五千二百五十名再回子佐領一員驍騎校一員頂戴領催一名領催三名披甲人七十名俱於回子內揀選補放此一佐領係入於內務府正白旗第五班參領兼管

三旗兼任驍騎參領十五員係奏准賞給三品虛銜頂戴驍騎副參領十五員賞給四品虛銜頂戴

凡各佐領管領下額設領催四缺各該衙門如必須佔用領催者准其佔用一缺 嘉慶二十一年五月本府奏准每旗參領處添派三旗世襲官二員學習行走幫辦旗務

設立內務府前鋒營護軍事宜

乾隆十三年奉旨學習解馬花馬箭之內務府護軍著另立一營欽此 是年奏准學習解馬花馬箭之護軍營命名爲內務府前鋒營設管轄護軍學習解馬花馬箭之員於內務府三旗護軍校委署參領內每旗各揀選二員給帶孔雀翎作爲章京仍食原錢糧於護軍校內各揀選二員作爲護軍校委署章京於副護軍校內各揀選二員作爲護軍校

給帶虛銜藍翎仍食護軍錢糧俱毋庸出缺仍隸內務府護軍統領管轄再由兵部揀選
臆肥良馬一百二十匹給與學藝之護軍等每人一匹令其拴養騎演照例得給馬銀此
項馬匹不令出青 十五年奏准嗣後遇有舊營副護軍參領缺出即以前鋒營之護軍
校委署章京補放一員俟再有缺出續以舊營之護軍校委署章京補放一員兩營即按
此輪流陞遷 三十年奏准前鋒營護軍等嗣後如有藝業好者於應陞之處將職名前
列再每旗各添護軍參領一員令兼前鋒章京管理前鋒護軍事務 嘉慶七年奏准三
旗前鋒教習內每旗添賞金頂藍翎長數缺奉旨內務府具奏解馬營請添金頂藍翎長
一摺日前朕閱看該營技藝尙屬嫻熟著加恩每旗添設藍翎長四缺即以教習補放並
著作爲額缺以示鼓勵欽此

圓明園三旗護軍並驍騎人員

雍正二年奉旨圓明園添設內務府三旗護軍參領各一員副護軍參領各一員護軍校
委署參領各一員護軍校各三員護軍各四十名內各添委署護軍校一員俱屬總理圓
明園八旗事務大臣管轄欽此 十年奏准添設營總一員定爲四品 乾隆三十七年

奏准營總護軍參領等賞給三品虛銜頂戴副護軍參領等賞給四品虛銜頂戴 五十年欽奉諭旨自設立圓明園兵以來六十餘年伊等人口生齒甚繁伊等生計不無拮据宜如何施恩之處查明奏聞欽此 是年奏准每旗添給馬甲十名三旗共添馬甲三十名 嘉慶十九年奏准三旗新鎗營陳鎗營內揀選健壯披甲人三百名及三旗前鋒營護軍一百二十名並該營章京護軍校等撥往圓明園附近地方添建營房一律教練每年應用公費等項以濩斤餘銀動用其前鋒營護軍參領委署護軍參領護軍校等員三年內如果教練有方技藝嫻熟護軍參領以應陞之缺儘先保送陞用所遺護軍參領之缺按次陞用年例應領火藥烘藥等物照例領取伊等應給米石移在豐益倉本裕倉就近支領

三旗拴養官馬

康熙三十五年奏准內務府三旗護軍等拴養官馬五百九十五匹每年出青一半內如有遺失者俱著落出廠大臣官員賠補自京抵口每馬一匹每日各給草一束 乾隆三年定准監視馬匹出廠官員兵丁每日各給路費銀一錢共預給六個月盤費銀十八兩

按起程回京日期計算扣除

鳥鎗營兵丁操演

凡內務府三旗鳥鎗護軍校護軍等每年秋季操演鳥鎗其應領火藥等項由都虞司轉行工部行取 嘉慶十八年奉上諭前經降旨令各旗營整飭武備著通諭前鋒護軍健銳火器各營八旗及圓明園各該管大臣各將本處操演日期看操處所及操演技藝按定章程報明軍機處由軍機處彙造清冊進呈存覽軍機處仍另錄一分備查嗣後遇該營操演之期朕不拘時地特派親信王大臣或侍衛等前往稽察如訓練認真技藝嫻熟將該兵丁獎賞並將該管官甄叙若期會曠誤技藝生疎將該兵丁斥革並將該管官嚴懲其操演時刻春秋二季著於辰巳二時如本日值雨准其停操若遇大風停操火器其餘各項技藝仍照常演習勿許曠惰欽此 十九年奏准內務府設有新陳鎗營額佔披甲人各六百名於三旗各佐領管領下按數挑取年力強壯之披甲人入營專心操練停其分派各處值班並於東安門西安門外擇取空閒地方建立公所二處以爲練習之地除兩營原設有鳥鎗一千一百二桿外添設弓一百二十張箭六百枝撒袋四十副長槍

六十桿腰刀六十把至新鎗陳鎗兩營如果實力操演三年內技藝嫻熟教練有方將該章京護軍校護軍等保送該旗以應陞之缺儘先陞用披甲等遇有無頂戴副領催缺出儘先補用無頂戴副領催遇有頂戴領催缺出儘先補用頂戴領催保送該旗以驍騎校遇缺即行拔補二十一年五月續經本府奏准令新陳兩鎗營操演技藝嫻熟之披甲人等輪值內班並於三旗閑散人丁內每旗挑選漢仗高大者一百名遇有本佐領管領下披甲人缺出補用三旗披甲人中擇其年歲強壯者每旗再挑選一百名均令附入新陳兩鎗營操演技藝並新陳兩鎗營原設披甲人三百名共五百名除值內班外仍足新陳兩鎗營操演披甲人原數每旗設頂戴領催一名無頂戴副領催一名仍食披甲人錢糧作爲班長每旗派驍騎副參領一員驍騎校一員會同原派之參領副參領等彈壓管束所有值宿操演拔補陞用均照前定章程辦理設三錢公費一百八十九分賞給值內班披甲人等以佐費用再設四錢公費二百分三錢公費一百分於新陳兩鎗營披甲人中擇其技藝嫻熟者揀拔賞給所需銀兩動用邊斤加價生息銀兩按月發給

文武官員食俸條例

雍正十二年奏准佐領定食俸銀一百五兩 乾隆元年奏准趕領俸祿嗣後春季正月三十日以前秋季七月三十日以前凡由無錢糧閑散人補授職官者准其趕領添本季俸祿銀米 是年奉旨在京大小文員俱給食雙俸遇有罰俸事件只罰正俸其恩俸仍行支給欽此 是年奏准無品級筆帖式定爲九品食俸並隨恩俸二年奏准嗣後由筆帖式挑補無品級頭目仍給與原品俸祿 是年奉旨嗣後大小京官遇有罰俸案件將本身應得俸銀按年月計算不必分晰扣除欽此 是年奏准嗣後由監生挑補頭目栢唐阿者不准食俸俱給與八品職銜照例給食栢唐阿錢糧由監生考試補用筆帖式者照部例給食八品俸祿四年奏准七八九品筆帖式俸米亦照驍騎校護軍校之例在京倉支領 十六年奏准熱河行宮總管員缺卽照依內務府額外郎中給食雙俸如有欽奉特旨補授者准帶原銜兼任給食雙俸 十八年奏准嗣後將隨任之幼官支給半俸概行停止俟回京後報明旗部仍照舊例給與再八旗外任營員如以老病告休歸旗因有軍功蒙恩賞給全俸半俸者俱按伊等原品酌減一等照在京旗員之例一體支給俸銀俸米至外任告休文職內有因軍功賞俸者亦照此辦理 二十一年奉旨避暑山莊

佐領職銜總管著給食郎中雙俸欽此 是年奏准旗員休致未完罰俸銀兩無俸可扣者概予免追如本身係世職官員及休致有俸者仍按數扣抵並世職兼職任官員未完罰俸銀兩如世職所罰之俸仍令襲職之人按數扣抵外如係職任內議罰之項即照職任官員之例一體辦理 二十六年奏准外任滿洲蒙古文職官員丁憂回旗經本旗帶領引見奉旨在原衙門行走者支給單俸如遇該衙門經制缺出奏請署理照經制人員一體支給恩俸 二十七年奏准嗣後署理六部堂官內如並無本任署理陞調事故員缺以及代署出差員缺者本身既無職任應支之俸自應支食署任單俸至現任職官署理者除應支本任正俸外亦應一體兼支署任恩俸 是年欽奉上諭向來在京文武官員有罰俸處分者止罰俸銀其俸米仍准支領而降革留任人員因處分較重是以降級留任者照所降之級支領俸米革職留任者停其支領第念在京官員多仰藉祿糈以資辦公若將俸米一併停減當差未免拮据其令自今以後凡在京文武官員有降級革職留任者止將俸銀分別停減其應得俸米俱准其照原品支領以示朕體恤臣工祿以養廉之意且京師多米流通亦一善事也欽此 二十九年奏准嗣後各衙門七品八品九

品筆帖式遇有罰俸事件亦照護軍校驍騎校一體扣除一半 五十一年奏准凡革職後棄瑕錄用武職人員其前任內所有革職留任及參罰案件均帶於新任

凡世職官員病故其妻孀婦應食週年半俸除伊子孫及親弟兄承襲不准給領外其族人承襲者孀婦週年半俸准其支領如有違例濫支將承辦俸檔之各官參奏辦理

凡遇降級留任官員病故伊妻孀婦週年半俸按伊夫降級支領

凡遇革退官員如有未完罰俸銀兩暫行註冊如遇有開復原職及另行起用之員再行扣交

凡被參革職部議降調官員內有棄瑕錄用仍令在額外官員上行走者毋庸支給俸祿得缺之日再行照例支給

凡被參離任及不能勝任人員奉旨在京職上行走者亦照棄瑕錄用之例其未經得缺以前均不准支給俸祿

凡各省年滿調京並裁缺另補以及病痊候缺人員奉旨在京職上行走者照丁憂回旗在各衙門行走之例一體給與俸祿文職回旗在原衙門行走者准支單俸如奏請署理

額缺支食雙俸至武職所食俸銀並無恩正之分其養廉銀兩未補實缺之員均減半給與

凡世職兼文職遇有降革留任之案均照文武兼任之例分晰扣除其世職兼武職職任內革職留任卽於世職俸內扣其應得之俸如有餘俸准其支領至所兼文武職任大於世職係支職任俸祿者職任內既經革職留任已無俸祿可支應俟開復之日再行照例支給若革職留任之後另行承襲世職或補放公中佐領給與新任俸祿所有降級案多至無俸可支者亦照此一體辦理

凡原有隨甲之員奉旨兼署大銜職任者准其支領署任大銜隨甲

凡由京補放駐防官員病故後伊妻孀婦在該處未及支領過週年半俸回京請領者照伊夫駐防處所原食銀米數目減半折給週年半俸其米石亦照在京米色數目按品支給

凡遇官員補放稅差俱支食單俸

凡補放稅差並倉場監督等各差使該處有養廉銀兩者由奉旨出差之日起計算在咨

部俸檔以後准其支領該季雙俸咨部大檔以前即將恩俸裁汰如一二年之差給食單俸俟該員差滿回京後如不及入檔將該季雙俸造冊送部補領
凡護軍校驍騎校遇有罰俸案件著每月扣除一半

凡盛京五部官員並陵寢官員遇有欠項該員所食之俸准其留京支領其武職官員不准將俸留京

道光二十三年四月本府奏准嗣後除奉旨簡放熱河正副總管戶部三庫庫差九江關監督係兼道員者仍照例開缺外其江南蘇州杭州三處織造粵海關淮安關監督均請照山海關張家口殺虎口之例仍留底缺委員署理其由部應支俸銀米石即行停領俟該員回京之日仍歸本任當差再支銀米准其接算前俸至天津鹽政一缺如由三院卿員簡放者自應請旨派員署理如由郎中及別項人員簡放調放者均請開其底缺以示區別
二十四年二月管理戶部三庫事務衙門奏准嗣後八旗內務府三旗及五旗包衣領取兵餉隨甲養育兵孤寡錢糧庫銀及趕領餉銀各按旗分改歸總數支領開放
六月戶部奏准嗣後除親郡王等俸銀仍照向例辦理外其八旗滿洲蒙古漢軍五旗包

衣內務府三旗外三營官員俸銀各按旗營改歸總數支領各旗營領出後由該管都統副都統等覆平查驗再行分放以昭慎重 是月本府呈准嗣後春秋二季本府三旗官員等支領俸銀著三旗副參領等由庫總數領至參領處聽候由堂派委司員前往覆平查驗後即責成派出之員會同該參領副參領等按分平封記即日由各該佐領管領出具圖片請領仍在參領處放給

賞給兵丁等米石銀兩

乾隆四十年欽奉諭旨八旗兵丁甲米閏月例不支放向雖特恩賞給並非常例第念京師五方聚集食指浩繁兵丁所得甲米糞殮自給之餘或將剩米出糶尙可潤及閭閻數十萬戶仰資其利現在正逢閏月例無應放之米兵民口食未免拮据著加恩賞給閏月甲米俾各永霑實惠著爲令欽此 四十五年奉上諭朕從前有旨將直隸旗租銀仍賞給八旗兵丁經部議挑選八旗兵丁中差使勤慎者賞給兩月錢糧以示鼓勵今思一人得兩月錢糧亦不能立家產不過隨手花費而不得賞者未免向隅且分別挑選該管官員不無瞻徇出入之弊殊非朕普惠八旗兵丁之意嗣後著將直隸解到銀兩足數普賞

八旗兵丁一月錢糧時該部卽奏聞普賞一次欽此

賞給內務府官員飯銀

雍正十三年奉旨內務府武職官員亦照文職官員例每年賞給銀一萬兩著每年具奏請旨欽此
乾隆二年奉旨文職既有雙俸停其賞給飯銀欽此
三十二年定准委署護軍校十五員入於賞武官飯銀內作爲四等賞銀得給
五十八年奏准應賞內務府武職官員銀一萬兩具奏奉旨照例賞給嗣後不必具奏每年著照例賞給欽此
嘉慶四年具奏每年賞給武職官員銀兩一摺奉旨著添車庫驛子圈披甲人紫禁城內進班披甲人掃院蘇拉等量加分賞欽此

凡正副參領佐領內有除派外差仍辦本任事務者將應賞飯銀仍准給與本員如另行派員署理卽將應賞飯銀給與署理之員

凡派在工程行走之三旗驍騎校內如有不辦本佐領下正項事務及不進班者將應得飯銀不准支給

賞給茶膳房人員馬錢

雍正四年奉旨茶膳房人差使繁多著交該總管將茶膳房人內行走勤慎効力當差者膳房揀選頭等十二名茶房揀選頭等六名每人每月各賞馬錢三千其餘每人每月各賞馬錢二千以此爲例再茶膳房侍衛內如有從前得過馬錢者著賞給雙分欽此
凡茶膳房當差人等如係內務府所屬者交該佐領管領下查明應行添裁之處照數添減

添設各項兵丁

雍正三年奏准內務府旗鼓佐領管領下挑取能射箭之閑散人三百八十名充當綠旗兵丁每月應得錢糧俱係巡捕營發給 乾隆四十六年奉上諭前經步軍統領衙門添設京城五營兵丁曾經降旨令將八旗漢軍敖爾布步甲閑散人等與民人一體挑選在案但內務府佐領漢軍人等現今滋生白丁亦多將此交與提督衙門將內務府佐領並管領下漢軍人等一併歸入擇其漢仗好者挑取欽此 嘉慶四年奏准內務府三旗添設養育兵六百名每名食銀一兩伊等每月錢糧由餘濫變價內放給 是年奏准三旗添設養育兵六百名奉旨著加恩照八旗賞給兵丁地租銀兩之例在於餘濫價銀內動

用銀六百兩一體賞給欽此 十年奉旨內務府添設養育兵著總管內務府大臣會同管理圓明園內務府三旗王大臣酌定數目具奏欽此欽遵會議奏准包衣三旗每旗添設養育兵二百名圓明園包衣三旗添設養育兵一百名共添設養育兵七百名每名每月支給餉銀一兩年終各賞給地租銀一兩俱動用廣儲司所得恆聚等六當利銀支給 十二年奉上諭朕廕念旗人生計艱難增設養育兵著即行挑補於五月起關支錢糧 其應支銀兩著於戶部庫內先行動項撥給欽此 是年奏准照嘉慶十年挑補養育兵之例覈計人丁數目共挑養育兵三百二十四名 十八年奏准由內務府養育兵內挑取旗校尉六百九名將裁駁民校尉之工食銀六百九兩每名每月添給銀一兩 道光十三年八月本府會同鑾儀衛奏准現在鑾儀衛充當校尉之本府養育兵六百九名嗣後遇有缺出勿庸由本府養育兵內挑補即由本府三旗閑散蘇拉內擇其漢仗高大者陸續挑補其續出養育兵之缺亦由本府三旗閑散蘇拉內挑補

武官軍政

凡內務府三旗護軍參領護軍校及驍騎參領佐領驍騎校散秩官員等如遇軍政之年

先行出具考語咨送欽派王大臣等照例入於軍政考查

凡軍政年逾六十護軍內有出過兵者並馬步箭清語堪作教習者仍留外其餘者均准換給披甲

凡內務府三旗護軍統領係武職三品堂官如遇軍政之年由內務府將三旗護軍統領履歷咨送兵部照依武職堂官軍政之例一體辦理 道光二年四月奉上諭托津等奏會同妥議軍政章程一摺所議是嗣後辦理軍政凡旗營各員年逾六十以上不能騎射者不准保列卓異此內如有年齒雖老精力尙健不但步箭嫻熟而馬箭亦屬可觀或曾經出兵著有勞績或於旗營事務實心經理者著該管上司出具切實考語保薦另冊報部經派出王大臣查驗屬實准其列入卓異其年至六十五歲以上者令該旗另送一冊出具能否騎射步射考語交派出王大臣秉公校閱分別去留仍將應去之員交兵部帶領引見至侍衛處鑾儀衛及前鋒護軍火器健銳圓明園等營各員年至六十五歲以上者著將侍衛冠軍使以下委前鋒護軍參領以上各官另爲一班帶領引見其八旗參領副參領佐領印務章京步軍營翼尉協尉城門領信礮章京步軍校委步軍校等官亦著

另爲一班與逾歲不射馬箭之前鋒校鳥鎗護軍校護軍校驍騎校另爲一冊由派出王大臣校閱分別去留仍將該員等步履年歲詳加考驗如未經該旗營歸入計典與參劾實係龍鍾衰邁者該王大臣即據實參奏勒令休致仍歸入計典六法人員內帶領引見其年齒雖老精力未致衰頹者另爲一疏奏請留任供職用示朕循名責實甄覈持平至意著爲令欽此

挑取護軍披甲人等

凡內務府三旗出有護軍披甲之缺亦照八旗之例每月不逾初十日挑補永爲定例嘉慶十八年奉上諭瑞齡奏分別挑選額兵一摺前鋒護軍係八旗訓練精兵自應以年力壯勇者挑補即驍騎營兵亦當以技藝較優者挑取不得以老弱充數嗣後前鋒護軍責成該統領等勤加訓練務俾一律精壯其不堪用者著照所請斥革分別補換至八旗挑補領催比試清漢文馬甲比較弓箭均著覈實辦理惟養育兵一項較其家口多寡挑取以資養贍著通諭八旗一體遵行欽此 道光十一年九月奉上諭富俊奏請覈實操演一摺國家額設兵丁必須平日勤加訓練使知激勸方足以成勁旅而資捍衛前經降

旨訓諭各都統等於挑選披甲時均以弓力爲重茲據富俊奏八旗定例向係開六力弓近日仍用本人弓箭往往以二三四力虛報六力似此相習成風兵力日形軟弱於武備大有關係自應嚴加考覈著照所請嗣後八旗各營凡挑缺揀選均遵照定例用六力官弓較射以定取去富俊所管鑲紅旗滿洲據奏置有六力八力弓各二張弓制一分月月挑缺揀選均以制准官弓較射如有告拉八力弓者果能裕如卽以八力弓爲合式每次揀選並不乏人可見我八旗原知向上總在教訓何如耳至八旗各營向有公費銀兩不難置辦官弓著卽仿照辦理該都統等務當認真覈實考驗不得仍令本人捏報弓力日久視爲具文以致有名無實並著查旗御史於各旗挑缺時留心查察如該都統等意涉瞻徇所挑之兵仍有虛報弓力情弊卽行具實嚴參其各駐防挑缺時並著該將軍等一體遵照均用六力弓爲定準以符定制而重武備將此通諭知之欽此

咨領大臣統領養廉

乾隆十年奉上諭朕自即位以來爲八旗生計曾增添錢糧借給庫項以爲接濟賞給伊等官地房屋以爲產業且不時賞賚區處旣已周詳而伊等生計未見饒裕蓋因生齒繁

庶一時不能盡使充裕候朕從容籌畫辦理至於八旗大臣雖給親丁錢糧養廉銀兩而生計亦未饒裕酌量伊等官職品級事務多寡作何分別添給養廉銀兩動用何項錢糧及辦事章京內未給親丁錢糧養廉銀兩者作何施恩給與等處著軍機處詳細議奏欽此 十七年奏准嗣後遇有專任之內務府大臣得給養廉銀五百兩再遇有委署內務府大臣即按卿秩養廉得給上駟院卿武備院卿奉宸苑卿內務府三旗護軍統領等各得給養廉銀四百兩每年春秋二季由戶部領給

領借庫銀

乾隆七年奏准內務府護軍校驍騎校每人各借給銀三十兩每月各扣本銀一兩利銀一錢五分扣至十個月後再找借給銀十兩

護軍領催每人各借給銀二十兩每月各扣本銀六錢利銀一錢扣至十個月後再找借給銀六兩

披甲人各借給銀十五兩每月各扣本銀五錢利銀七分五釐扣至十個月後再找借給銀五兩

各項栢唐阿內有食四兩錢糧者按借給護軍統領催之例辦理食三兩錢糧者按借給披甲人之例辦理

食二兩錢糧之栢唐阿每人各借給銀十兩每月各扣本銀三錢利銀一分五釐扣至十個月後再找借給銀三兩

凡食二兩錢糧人內有官學生學藝人教習油畫栢唐阿式幫栢唐阿等伊等差使不甚勞苦概不借給

凡借銀人內如有病故年老具呈告退者照原議豁免若係獲罪之人著落家產子孫賠補儻實無產業子孫不能賠還者該參領佐領管領等具結將所欠銀兩邀恩一體寬免

隨圍護軍統領等應得銀兩

乾隆十年定准嗣後派出隨圍去之內務府護軍統領得給幫銀七十五兩護軍參領侍衛委署參領並驍騎參領等每員各得給幫銀三十兩五錢 十二年奏准嗣後派出隨

圍之內務府司員及散秩官六品以上等官得給幫助銀兩自起程日起如逾一個月者得給幫銀二十兩逾二個月者得給幫銀四十兩六品以下等官逾一個月者得給幫銀

十兩逾二個月者得給幫銀二十兩 二十五年奉上諭八旗兵丁凡遇派出差務在部支領路費銀兩原係按日支給之項設有在途病故者例應計日扣算追繳但念伊等因公奉差在途病故其中無力交還者居多嗣後凡遇出圍牧廠及一切差務如有在途病故者加恩一概免其追繳永著爲例欽此 二十六年奏准凡遇有呼圖克圖隨圍其餘派伊徒門前往應役每名各給官馬一匹每日盤費銀一錢馬匹由都虞司行給盤費由會計司行給 二十七年奏准嗣後隨圍回京官兵應交沿途倒斃遺失官馬駝隻折價銀兩即交各該旗催交如有逾限未交者該旗卽行參奏若係官員交部議處兵丁從重懲責仍令照例賠銀其承催不力之該管官員交部查議 是年奏准嗣後內務府派出隨從木蘭圍去之食五兩錢糧之護軍校驍騎校等各得給幫銀十九兩食四兩錢糧之護軍領催等各得給幫銀十五兩二錢食三兩錢糧之披甲人等各得給幫銀十一兩四錢 二十八年奏准三旗護軍參領護軍校護軍等隨圍用帳房一架都虞司隨圍用帳房二架 嘉慶六年定准嗣後派出隨圍之三旗護軍統領照卿員幫銀之例得給如隨圍一個月應得幫銀八十兩兩個月應得幫銀一百五十兩三個月應得幫銀二百二十

兩護軍參領如隨圍一個月應得幫銀二十兩按月遞加得給十一年遵旨奏查內務府隨圍人員應領馬匹量爲裁減奉旨這所擬原得四馬三馬二馬人員均各減馬一匹著照所議辦理其得一馬擬減者每遇隨圍若無馬匹未免勞苦著加恩領催各賞銀三兩披甲人等各賞銀二兩作爲盤費以示體恤欽此是年奏准內務府所屬各該處原得馬一匹擬減之領催披甲人倉上人廚役蘇拉匠役人等凡大圍減馬一匹賞銀四兩小圍賞銀三兩十三年奉旨嗣後由哨內帶出麀鹿野雞內倒斃一半將收養司官罰俸催長責革倒斃未及一半將司官催長記過儻有倒斃牲畜令收養司官等即時回明內務府大臣查驗再交膳房到熱河時內務府膳房均各如數奏聞欽此

隨圍官員等馬匹折價

道光二十三年閏七月兵部咨稱本年七月奉上諭前據兵部具奏變通調用馬匹一摺現在各旗營馬匹俱經裁減毋庸再行調用如遇阿哥致祭陵寢需用馬匹卽照單開酌定領馬數目每馬一匹賞銀三兩預期報明兵部覈准轉行戶部令各該處自行備文向戶部關領其餘需馬較少差務仍照舊在各旗營調取欽此凡遇阿哥祭陵酌定內務

府領馬數目一分領馬二十八匹 二分領馬三十三匹 三分領馬三十八匹 四分
領馬四十三匹 如遇皇上謁陵阿哥隨往需用馬匹數目每一分領馬四匹 二十四
年正月總理行營王大臣奏准嗣後前往東陵西陵隨扈官員達他栢唐阿兵丁匠役等
應領馬匹全行折價每匹折給價銀三兩由各該衙門造冊向戶部支領如有增減咨行
兵部查覈

印票及... 水手等... 三十二... 山三...
... 共四百三十名... 均由...
... 併改入內務府...
... 每員銀二兩... 每員銀一兩...
... 每員銀一兩... 每員銀一兩...
... 每員銀一兩... 每員銀一兩...

欽定總管內務府現行則例

都虞司卷二

轉行錢糧米石

乾隆十六年奏准昆明湖新添水操船隻應需水手四十八名內把總銜正舵工八名每名每月支工食銀二兩九錢水手四十名每名每月支工食銀二兩一錢七分五釐舵工水手每月一體支三色米三斗其每月應領錢糧銀兩由內務府正黃旗旗鼓佐領下造具冊檔轉行戶部仍出具印領交該參領持赴戶部支領給發至應領米石每月出具司印米票交該佐領下領催帶領水手等豐益倉關支 三十二年奏准南府景山三旗佐領下學藝外家並招募學藝外家共四百三十名所食錢糧支借庫銀嗣後均由廣儲司支領借給至三旗學藝外家應領米石一併改入內務府恩豐倉支放

領取公費紙張筆墨炭斤等項

每月應領公費之郎中每員銀三兩員外郎主事每員銀二兩二錢筆帖式每員銀一兩呈明移咨戶部領取 乾隆五十九年奏准將在京各衙門公費銀兩一體改爲局錢每銀一兩酌給制錢一千文按月關給

每年應領本紙八十一張棉榜紙一千四百四十張台連紙二千四百三十張銀硃八兩
咨行戶部領取
應用水筆二百枝南紅紙四張徽墨一斤八兩印色二斤移付廣儲司領取
三旗護軍營每年共用棉榜紙一千二百張水筆一百五十枝徽墨一斤八兩銀硃十五
兩由廣儲司領取

每年十一月至次年正月每月應用燠硯炭九十斤由營造司領取
道光二十五年七
月本府呈准各司處官員等每月應領公費制錢向由各該處分稿呈辦殊繁案牘嗣後
各司處應領公費制錢均著造冊送堂由堂彙總行領

官員人等應賠應交各項銀兩

凡內務府一切交項銀兩俱令值月參領等按限催得交送都會二司各照定限解交該
部並造具文冊知照該旗如有應查應催之項由部徑咨內務府查催
凡係交銀之案儻有遺漏舛錯逾限等項情節一經查出將該值月參領並佐領管領等
指名送堂記過

凡交部餉銀於戶部收訖知照該旗之日即將收銀回批一併咨送該旗查驗俟該旗於歲底奏銷之時令該旗出咨將原批繳送內務府

凡內務府如有應交之項所得批文於十一月內彙總咨送鑲黃正黃正白三旗都統以備題銷

凡三旗各佐領管領下如有應交各項銀兩於每月十六日起限五日交齊如逾限十日不交將該值月參領記過二次二十日不交者遞加記過至官員應交一切銀兩亦照此例辦理

乾隆五十三年奉旨據正藍旗滿洲奏請將原任奇台縣知縣揚桑阿名下應追覈減車價修理倉廩銀二千四百餘兩於伊子孫錢糧內減半坐扣等語此項銀兩非揚桑阿侵蝕入己之項均係由部覈減且揚桑阿已經正法抄沒家產其揚桑阿子孫錢糧內坐扣之處著加恩寬免仍著落揚桑阿該上司分賠再嗣後凡官員名下應追銀兩內如係侵蝕入己之項俱著落伊等子孫賠補若非侵蝕入己或已抄沒家產治罪或係此等覈減分賠之項僅止著落伊子賠補毋庸著落伊孫及兄弟賠補均著落各該上司分賠卽爲

例著交八旗一體遵照辦理欽此

革退逃走兵丁交回銀米

雍正十二年奏准兵丁等內有革退逃走者領過錢糧銀兩卽按革退之日追繳其領過米石後一月內革退逃走者追繳後三個月米石兩個月內革退逃走者追繳後兩個月米石三個月內革退逃走者追繳後一個月米石三個月以外革退逃走者免其著追應交錢糧暨米價折銀卽行催追完交不得入於此月錢糧冊內扣除
十三年奏准革退兵丁等應交錢糧免其追交將逃走兵丁應交錢糧暫貯旗庫於每年三月內彙總交部
道光二年十二月准戶部奏准嗣後逃走及獲罪革退兵丁未完庫銀有兄弟子姪親族係食餉兵丁仍照定例坐扣外如止食孤寡錢糧以及支食週年半俸半餉者一切應扣款項由該參佐領查明具結報部准其寬免

承催錢糧人員賞罰事宜

雍正九年奏准各處應催錢糧數目編爲十分除未完不及一分者不議外其欠一分以上者承催之催總鞭責二十領催鞭責三十官員罰俸三個月欠二分以上者催總鞭責

三十領催鞭責四十官員罰俸六個月欠三分以上者催總鞭責四十領催鞭責六十官員罰俸九個月欠四分以上者催總鞭責六十領催鞭責八十官員罰俸一年欠五分以上者催總鞭責八十充當領催領催鞭責一百斥革官員降一級欠六分以上者催總鞭責一百斥革領催枷號一個月鞭責一百斥革官員降一級罰俸一年停其陞轉戴罪督催所有未完錢糧歸入此年銷算按限催追完報如一年應徵銀糧全完者官員紀錄一次催總領催記名陞轉如將應徵錢糧連完三年者官員加一級催總領催卽以應陞之缺列名陞轉 十二年奏請應交錢糧承催全完之官員加級紀錄之處奉旨承催錢糧官有何功加級如許之多從前作何定擬著查明再議具奏欽此欽遵於十三年奏准嗣後一年錢糧承催全完之官員照例紀錄一次外其一連三年錢糧承催全完者停其加級亦准紀錄一次至六年錢糧承催全完之官員准加一級若拖欠錢糧一分至六分以上者仍照從前議處

參領佐領隨甲

乾隆元年奏准護軍參領驍騎參領各給隨甲二名副護軍參領各給隨甲一名半其所

給隨甲每名每月給錢糧銀三兩米折銀一兩於正項內按月關支佐領等令於本佐領下額甲數內各給一副俟缺出扣除 是年定准內務府護軍統領與外旗護軍參領品級相同其應得之隨甲亦應照外旗護軍參領之例得給 二十年定准嗣後內務府三旗副參領佐領如有除派外差另行派員署理即將應得隨甲給與署任之員 道光二十三年四月多羅定郡王等奏准除八旗佐領三旗包衣佐領步軍協尉副協尉捕盜章京步軍校應得隨甲係於額設馬步甲內撥給毋庸議減外其餘自領侍衛內大臣起每月隨甲餉銀米折銀及米石均擬暫減一半

稽察兵丁等借放重利

乾隆十七年奏准嗣後八旗兵丁如有典買米石之人一經查出將伊等嚴行治罪其失察之參佐領等亦交部議處奉旨依議爾等俱有撫育旗人之責一切俱當實心勉力辦理今此一事務須嚴禁著各該旗嚴加查拏如有查出似此者即照原奏辦理毋得草草放過至歲底將有無似此私行典買米石旗人之處由各該旗奏聞儻有似此者不能查出朕將該管都統定行從重究處欽此 是年奏准嗣後八旗以及內務府如有四分以

上重利放債借貸之人如被查出將放債與借貸兩造通行治罪並將所欠銀兩照數追出入官奉旨將重利放債銀兩追取入官所議未是著收貯各該旗俟成總之時或賞給兵丁內之優好者以示鼓勵或賞給貧乏人等之處酌量應用餘依議欽此

每年行令三旗參領將兵丁人等有無典買錢糧米石並有無重利放債之事查明具保於歲底一併具奏

守制定例

乾隆二年奉上諭在京八旗文武各官遇有親喪例於持服百日之後即入署辦事原以旗員人少若令離任守制恐致悞公而伊等在二十七月之內仍於私居持服以自盡心惟是朝會祭祀之期或有執事或應陪祭祀處仍俱一體行走未加分別俾盡孝思嗣後在京旗員有親喪者二十七月之內遇朝會祭祀之禮應一概免其行走現今禮部纂輯禮書著將此旨交該館載入一體遵行欽此 是年奏准嗣後文武旗員遇有親喪百日後仍令入署辦事並照常支俸除奉特旨陞用人員外其餘遇有陞遷暫停開列陞轉至服滿後較俸之時仍准算俸再生監舉人進士二十七月亦俱暫停考試銓選參將以下

等官除軍機調遣仍不准給假外其餘各營武職自參將以至千把無論獨子與非獨子凡遇親喪俱應給假其父母歿在任所者准其扶柩歸葬在籍病故者准其回籍奔喪近者不得過六個月遠者不得過十個月該督撫將給假日期咨報兵部事畢後卽依限回營辦事未滿服之前無庸陞轉至服滿後仍准算俸嗣後內務府文武官員生監人等凡有親喪俱照此例遵行 道光元年六月吏部奏准嗣後凡官員本身係屬庶出生母早故父令別妾撫養者謂之慈母如慈母病故時准令離任丁憂二十七個月仍於報丁文內聲明生母係何姓氏慈母係何姓氏取具親供甘結報部如有假捏照例議處其尋常報丁及起復文內仍無庸聲叙有無慈母以免查駁 二十三年七月吏部奏准八旗外任人員父母在旗病故該家屬於遭喪之日卽呈報該參佐領該參佐領於本員丁憂五日限內先出具圖片報部如該員病故之日適遇截缺之期令該家屬於遭喪之日呈明該參佐領該參佐領卽行出具圖片報部開缺

遲延者
免議

除派隨從人員

凡皇后內庭主位往圓明園派馬引步引司官各四員引導跟隨由圓明園進宮內騎馬

引導司官至景山西門步行司官接行引導至順貞門總管內務府大臣一員護軍統領一員護軍參領二員護軍校二員護軍十八名帶豹尾鎗再添護軍參領二員護軍校八員護軍一百二名引導隨從 嘉慶六年奉旨嗣後凡遇皇后出入著派馬引司官四員步引司官四員馬引內管領四員步引內管領四員內庭主位出入著派馬引司官二員步引司官二員馬引內管領二員步引內管領二員欽此

凡隨從阿哥赴圓明園等處及進城派八旗護軍參領護軍校護軍等員引導用都虞司印文移會景運門該班護軍統領除派

凡阿哥娶福晉及公主下嫁所有導引隨從護軍參領護軍校護軍等俱據掌儀司咨文照例除派

凡隨從公主赴圓明園等處及進城派六品官一員護軍校二員護軍十六名引導隨從
凡隨從阿哥之福晉出入於六品文武官以上除派二員派護軍參領二員護軍校二員護軍十八名引導隨從

凡隨從青緞圍車出入於六品官八品頭目驍騎校散秩官內除派二員護軍校一員護

軍九名引導隨從

除派署副參領人員

凡副參領內如有除派別項外差者其缺即另行派員署理所派署理之員擬定驍騎校等員內揀選呈明除派署理

稽察進班員弁

凡看守宮門派三旗護軍統領參領護軍校護軍等及三旗驍騎官員兵丁等按各旗輪流班次看守

紫禁城內順貞門

頭班護軍統領一員
二班司鑰長一員

參領一員護軍校二員護軍三十四名

西鐵門護軍校一員護軍九名

慈寧門護軍參領一員護軍校一員護軍九名

慈寧左門委署護軍參領一員委署護軍校一員護軍九名

慈寧右門委署護軍參領一員委署護軍校一員護軍九名

永康左門護軍校一員護軍十九名

原設九名嘉慶十八年添設十名

永康右門護軍校一員護軍九名

慈祥門護軍參領一員護軍校一員護軍九名

貞順門護軍參領一員護軍校一員護軍九名

寧壽宮東北鐵門委署護軍參領一員委署護軍校一員護軍七名

寧壽宮西北鐵門委署護軍參領一員藍翎長一員護軍七名

三所正門護軍參領一員護軍校一員護軍十九名

如意門委署護軍參領一員藍翎長一員護軍八名

英華殿披甲人五名

壽安門領催一名披甲人六名

實錄館披甲人五名

武英殿領催二名披甲人十名

御書處披甲人五名

南薰殿領催一名披甲人五名

白虎殿披甲人五名

南府錢糧處披甲人五名

造辦處副參領一員世職官一員領催一名披甲人二十名

咸安門領催一名披甲人五名

衣庫披甲人四名

磁庫領催一名披甲人十名

銀匠房領催一名披甲人五名

鰲山庫披甲人四名

圍房披甲人五名

四局領催一名披甲人四名

井兒上披甲人五名

乾肉庫披甲人五名

火班披甲人二十名

寧壽宮披甲人五名

三所副參領一員披甲人四十名

育喜房披甲人五名

兆祥所披甲人五名

以上三旗護軍營驍騎營進班員弁按旗輪流更換

道光二十六年七月本府呈准嗣後紫禁城內東西朱奇進班披甲人等均責成派出兼營之副參領驍騎校一體管束遇有事故無論東西俱惟副參領是問驍騎校亦不得辭其咎庶免推諉而昭慎重

看守各行官員弁陞遷

凡遇千總六年期滿以內務府司庫庫掌副內管領驍騎校等官內帶領引見補用其千

總缺出以委署千總補用其委署千總缺出由該處兵丁內挑補

凡熱河苑丞缺出以該處千總帶領引見補授所遺之缺按次陞用

盛京三旗人員陞遷

凡盛京佐領缺出俟文到之日於在京五品以上文武官員內揀選帶領引見補授驍騎校缺出該佐領等將本處人員內揀選出具考語保送帶領引見補授催總領催缺出該佐領等將本處人等內揀選出具考語呈報准其補用

凡遇大計軍政之年將盛京內務府佐領下司庫筆帖式驍騎校等令該佐領等分別考察等第出具考語咨送盛京將軍衙門覆覈咨報內務府查覈如有保薦頭等者照盛京文武官員之例帶領引見

盛京等處牲丁交納定例

盛京牛莊等處網戶四十八丁每丁交魚五百斤如缺魚一斤折交銀三分鷹手八丁半每丁交野雞一百隻如缺野雞一隻折交銀一錢打狐皮戶二百六十一丁每丁交狐皮四張如缺狐皮一張折交銀五錢蜜戶三百五十五丁每丁交蜂蜜二瓶半每瓶二十斤如缺蜜一瓶折交銀五錢王多羅樹牲丁三十丁每丁交野豬二口鹿肉條九十把如缺野豬一口折交鹿二隻如無鹿隻折交銀六兩缺鹿肉條三把折交銀一錢海龍戶十八丁每丁交海龍皮四張如缺海龍皮一張折交銀一兩鶴戶十丁每丁交鶴翎十五副如

缺鶴翎一副折交銀三錢細鱗魚戶三十丁每丁交細鱗魚五十尾如缺細鱗魚一尾折交銀四分密雲縣等處鎗手十八丁每丁交鹿二隻如缺鹿一隻折交銀三兩鷹手八十九丁每丁交野雞一百一十隻如缺野雞一隻折交銀一錢薊州等處蜜戶六丁每丁交蜂蜜二瓶每瓶二十斤如缺蜜一瓶折交銀五錢永平府等處蜜戶十一丁每丁交蜂蜜三瓶每瓶二十斤如缺蜜一瓶折交銀五錢張家口鷹手六丁每丁交野雞一百隻如缺野雞一隻折交銀一錢冷口鷹手七十丁每丁交野雞一百六隻如缺野雞一隻折交銀一錢以上雜魚野雞鹿隻肉條交送膳房鶴翎交武備院海龍皮狐皮交廣儲司蜂蜜交掌關防內管領處俱照例抵銷錢糧應折銀兩催交廣儲司

凡盛京所交鹿隻肉條停其折徵銀兩仍令交送鹿隻肉條

凡冷口等處牲丁應交麀鹿等項仍照例交納停其折徵銀兩

凡牲丁等開有餘地准其按响交糧其每年加增野雞停其交納

凡盛京右屯衛並打牲烏拉等處獵戶鶴戶海龍戶狐皮戶等戶每年更換信票將舊票

繳回更換新票

道光九年十一月本府奏准盛京王多羅樹牲丁等每年應交鹿肉條等項既經停止著照例折交錢糧以符定額 二十二年十月奉硃批每年盛京將軍應進冰雜魚二萬四千斤減九千斤 二十三年二月本司呈准所減魚斤每斤應交折色銀兩照例交納 二十五年九月盛京將軍奏請將應交本色冰雜魚一萬五千斤援照前減之九千斤成案全數改交折色等因 是年十月御茶膳房議覆奏准盛京每年應進冰雜魚一萬五千斤准其改折銀兩照例交納

打牲烏拉人員陞遷

凡打牲烏拉官員缺出該總管等於本處人員內揀選出具考語保送到京帶領引見補授再筆帖式缺出該總管等於本處効力行走人員內揀選出具考語呈報准其補用 凡打牲烏拉倉官應以五年爲滿保送來京照例以主事陞用於八缺後補用如不願來京者以該處驍騎校補用

凡打牲烏拉處驍騎校翼領等賚送物件來京應得口糧以及餒馬草料等項均由本司轉行各處得給

投充打牲新丁定例

內務府帶地投充新丁共計一千三百七十丁分爲三旗每丁有地自五晌至九百晌不等共地二萬五千一百十九晌五畝一分六釐五毫此內有水地五十六晌五畝五分六釐二毫水地每晌徵銀一兩五分旱地每晌徵銀三錢五分再吳爾占名下無地牲丁三名各徵丁銀二兩每年共徵銀八千八百三十七兩六錢六分四釐五毫催交廣儲司內有交納牲隻者照例折銀抵銷地畝錢糧如有被水地畝俟其報到之日具奏停其徵收錢糧內有衝壞溝渠水地雖不能耕種水田尙可改種旱地者停其徵收水田錢糧仍照旱地之例徵收再衝成溝渠不能耕種者將應徵錢糧暫停徵收於每年秋季後派員查驗 道光十年五月本司呈准嗣後本司所屬鷹雀鷓鴣等戶牲丁頭目遇有拖欠錢糧革退遺缺不准伊子孫頂替者請照管理三旗銀兩莊頭處之例曉諭本族親丁有能代完陳欠予限六個月赴該衙門具呈准其頂替如限內有二三人赴司均願呈充者無論具呈先後應接近派充補其遠支令將原呈撤回儻限外無人接充無論具結與否出票曉諭身下戶丁及另姓牲丁等有能代完欠項給限三個月赴司具呈頂替如有二三人

到司均願接充者定爲籤掣至三個月限滿無人頂替卽將差地照例退交地方官徵租
解司歸款

盛京聽差馬羣

盛京聽差馬三羣每羣馬五十匹設牧長各一員牧丁各六名管理每年聽差馬內無倒
斃者牧長賞毛青布二十四牧丁賞毛青布十四倒斃一匹以上至六匹者不議外如被
人盜去者俱令賠補若不加調習以至倒斃七匹以上至九匹者牧長牧丁各鞭責八十
倒斃至十四匹以上者牧長牧丁各鞭責一百其老病殘疾不堪應用馬匹交該佐領賞給
該處貧窮匠役其應補馬匹由上駟院將養什牧馬羣內駑馬撥給所賞布匹向廣儲司
領取

投充打牲新丁交納折價定例

凡交海青每架折銀三十兩外仍賞銀十兩毛青布二十四匹白鷹每架折銀三十兩頭等
鷹每架折銀十五兩二等鷹每架折銀十兩三等鷹每架折銀五兩四等鷹每架折銀一
兩鴉鵲鷓子每架折銀一兩松兒鶡兒細雄擺雄每架折銀五錢鹿每隻折銀二兩麀每

隻折銀一兩三錢兔每隻折銀一錢五分狐皮每張折銀一兩五錢芝蔴鷓翎每副折銀一兩五錢鴿子每個折銀五分喜鵲寒鴉烏鴉每隻折銀六分佳雀每個折銀一分野鴉每隻折銀三分鷓鴣每個折銀二分四月至九月熱鹿每隻折銀三兩俱准於地畝錢糧內抵銷

凡恭交奉先殿薦鮮野雞野雞蛋俱不准抵銷錢糧

凡武備院所用老鸛翎亦不准抵銷錢糧

道光二十二年正月熱河都統奏准將額魯特養鷹頭目栢唐阿陸續裁汰經本司呈准所有鴉鶻戶每打捕鴉鶻自本年起毋庸打捕停其交納照例每架折銀一兩歸入正項錢糧覈銷

徵納烏拉蜂蜜松子牲丁錢糧

初烏拉採蜜牲丁一百五十名並無錢糧各給幫丁二名每名交蜂蜜三瓶半每瓶計二十斤多交一瓶者賞毛青布一匹缺一瓶者以二瓶計責五鞭 康熙五十二年奏准多交二瓶者賞毛青布一匹缺一瓶者以二瓶計責五鞭各旗內所得蜂蜜合計除定額多

交十瓶以下者無庸議外多交十一瓶以上者該管領催亦以二瓶計賞毛青布一匹多交至二十瓶者賞彭緞一匹更有多交者亦以二瓶計賞毛青布一匹如一連三年得賞者賞緞鑲領袖彭緞袍一件如缺交一瓶以上九瓶以下者免責缺十瓶以上者以一瓶計責二鞭如一連三年被責者革退領催鞭責一百充當壯丁三旗共得蜂蜜覈計除定額多交三十瓶以上六十瓶以下者該管採補之驍騎校賞緞鑲領袖彭緞袍一件此外更有多交者以二十瓶爲一倍賞彭緞一匹如一連三年得至緞袍賞賜者賞給狼皮端罩一件缺交十五瓶以下者免其治罪缺交十六瓶以上二十瓶以下者罰俸一個月缺交二十一瓶以上三十瓶以下者罰俸兩個月此外更有缺交者以十瓶爲一倍每一倍罰俸一個月如罰俸至一年者降一級罰俸至三年者革退驍騎校 是年奏准盛京停其採取松子令烏拉牲丁採取每年共交松子十五石松塔一千個

查比牲丁定例

每三年一次查比牲丁完時造冊存案

凡查比牲丁五歲以上者卽令呈報入檔或有患病等情所報不准過二次年亦不得逾

十五歲

挑補鷹手

張家口居住鷹手頭目一名鷹手六名密雲縣居住鷹手頭目八名鷹手八十一名頭目缺出於鷹手內選補照例移付會計司每月各給二兩錢糧米石如鷹手缺出令該頭目呈送應補之幼丁挑補仍向該佐領取具保結移付會計司每月各給一兩錢糧米石

裁減官馬

道光二十三年四月管理圓明園八旗內務府三旗事務大臣奏准三旗護軍營拴養官馬四十四匹內裁減二十四匹 五月武備院奏准該院飽頭匠頭目一名帳房頭目二十四名每月各領馬銀三兩內減去一兩五錢弓箭傘達他栢唐阿承應人一百七十九名每月各領馬銀一兩五錢內減去七錢五分 是月茶膳房奏准該處侍衛章京等所拴養之官馬各減一匹 九月本府奏准三旗護軍營每年出青馬二百三十七匹卽行裁汰至每年正月皇上初次幸園及冬季進宮二次差務用馬較多如有不敷准其調用精捷營官馬六十四匹以資協濟

鈐用印信

道光二十五年六月本府奏准嗣後除本府所屬各司處互相行文並六庫開庫日期領用銀兩物料呈報景運門御史衙門及行文三院王府門上各等處仍照舊行用司印外其餘應行京外各衙門文書均著呈畫堂稿改用堂印如遇緊急事件用堂印不及者呈明先行白片後補印文如僅止行查知照咨覆無關緊要之件未便具稿即照各衙門設立堂行簿呈堂標畫後用印咨行或撤取預用空白印片咨行十月本府呈准嗣後各司處堂行簿均著鈐用司印騎縫以憑稽覈

接收丁冊

道光二十四年十二月奉旨前據德誠奏擬將內務府官員栢唐阿等丁口冊檔按照八旗成案咨送內務府存查一摺當交該衙門議奏茲據內務府奏稱向因稽查戶口該管領等於京中不能切近難以查考是以並不造送戶口丁冊惟德誠所奏究爲預防流弊起見著仍照所請准其將西陵內務府額設官員栢唐阿等三百餘戶每於年終將添裁丁口冊檔造送內務府存案其東陵內務府事同一律亦著照此辦理嗣後該官員栢唐

阿等遇有干議事故其在京管領佐領相距較遠查察難周並著免其查議所有造送丁冊應如何援照八旗成案辦理之處著該衙門再行妥議章程具奏欽此 是月本府議覆奏准嗣後東陵西陵內務府官員栢唐阿等戶口丁冊即援照八旗官員兵丁戶口造冊咨送京旗之案將各戶口丁冊詳細各造二分咨送本府交都虞司會計司收存遇有該處官員等陞遷事故及添裁丁口於文到時即令隨時稽查儻有不符之處即行呈明查覈辦理每遇京中更換佐領管領時仍循照舊章行知該處亦卽註冊

恩賞事宜

道光二十三年五月戶部咨稱欽派王大臣奏准八旗文武職員紅白事賞銀各減一半兵丁紅白事賞銀各減二成以示限制 二十五年八月本府呈准嗣後本府三旗各佐領管領下若有應領紅白事件銀兩印領送付該旗參領處每十日由參領處彙總辦理門文一件赴銀庫支領

查銷冊稿

道光二十四年奉上諭給事中奕萬奏各衙門廢稿存貯滋弊請飭變通一摺著在京文

武各衙門查明議奏欽此 是年五月本府議覆奏准嗣後每屆二年將本府庫內收存冊檔稿件派員清查一次即將無用之件運出銷燬至圓明園造辦處御茶膳房御藥房寧壽宮精捷營等處及本府所屬之三旗護軍營此後亦每屆二年由各該處自行查覈呈明本管大臣將無用之件送交內務府彙總銷燬

欽定總管內務府現行則例

都虞司卷三

除派執燈人員

雍正四年奉旨凡祭壇廟午門前大臣侍衛等騎馬之處著執羊角燈二十對祭堂子下馬之處亦著執羊角燈十對欽此

一祭太廟社稷壇午門兩傍排列跼燈二十對派武備院營造司庫守各十名護軍二十名執燈

一祭天壇地壇祈穀壇先農壇等處午門兩傍排列跼燈二十對行燈五班每班預備燈三對派執燈護軍校二員庫使七名護軍二十一名如路遠照校尉班次添派護軍預備

一祭堂子午門排列跼燈俱照詣壇廟之例堂子門外下馬牌兩傍添列跼燈十對派武備院營造司庫守各五名護軍十名

一詣大高殿及各寺廟行禮派內務府官二員內管領二員跼班

一祭壇廟所執馬燈除派護軍等執掌所執牆子燈除派庫使執掌

嘉慶十八年奏准每逢天壇大祀皇上駐蹕齋宮犧牲所添派內務府烏鎗護軍三十名
凡隨從皇上出入派馬燈五班每班燈三對派護軍校二員庫使七名護軍二十一名執
燈

凡請佛像派有品級頂戴之頭目筆帖式以及庫守等六員護軍校一員俱穿補服護軍
九名騎馬引導

招募書吏

凡書吏缺出出示招募呈明移咨吏部吏部取具該地方官印結咨部充役五年期滿呈
明移咨吏部考職

凡各司等處書吏招募及期滿咨部等事由都虞司據咨辦理

凡在京簡缺書吏役滿時即由各該衙門自行考試試畢之時知照都察院將該役飭回
原籍並將考過各卷加具冊結封送吏部於年終彙入外省各卷一體奏請校閱

道光九年四月奉旨吏部奏覈議御史安豐奏嚴禁京外書吏戀役朋充一摺著照所議
嗣後各衙門書吏掣補時定限十日內一面取結一面承充俟取結到部卽作爲該吏著

役日期不准另有代辦名目其取結時行文各該省遵照定限卽行報部毋得延緩儻該吏家屬具結逾限卽將該吏黜革如有朋充戀役情弊將該吏按律治罪並將出具保結之書吏一併斥革至各關書吏頂替朋充猶所不免著責成各關監督嚴行飭禁有犯必懲並不准於監督任滿時通情舉保任意留充盤踞儻該監督有瞻徇情事著各該督撫查明參奏照例議處自此次申諭之後各該管官務當隨時認真查察實力奉行儻日久懈生仍致該書吏有朋充戀役之弊或被人告發或別經參奏除將該吏按律治罪外定將失察之該管官一併懲處不貸欽此 十一年三月奉上諭書吏役滿例應地方官押令回籍不准在京逗遛據戶部奏請飭查已革捐納房額外貼寫桑培元及上年刑部查傳未到之曾充捐納房額外貼寫蔡士法等語該吏等如果逗遛在京改易姓名出入衙門難保無影射撞騙情弊著順天府五城確切查明卽行押令回籍嗣後各部院衙門革退書吏均著照役滿之例一面斥革一面咨交地方官押令回籍不許逗遛務須隨時認真查察毋任隱匿以杜奸宄而清流弊欽此 十九年十月奉上諭御史萬啟心奏請飭禁書吏把持一摺各衙門額設書吏例限五年期滿飭令回籍另募妥實之人承充不准

盤踞把持致滋弊竇前降諭旨甚明白應認真辦理若如該御史所奏近來京師各庫及稅務衙門書吏當役滿告退之後其接充者非其子姪即其親戚如銀庫書吏大半皆係史姓崇文門稅務書吏大半皆係張王等姓盤踞把持已可概見等語此輩狡猾性成易於作弊似此子姪親戚接續遞充即與己身復充無異不可不嚴行查禁著管理各庫及稅務衙門留心察看嗣後書吏五年役滿即行另募承充並查明籍貫取具保結不准令其子姪親戚朦混接充仍著隨時查察如有身後影射等弊即嚴行懲辦務使奸猾警懼弊竇肅清將此通諭知之欽此 二十一年十二月本府奏准都虞司會計司掌儀司營造司慶豐司管理三旗銀兩莊頭處額設書吏均無專責承辦之件亦僅止書寫文稿等事今廣儲司書吏既擬裁汰應請將都虞司會計司掌儀司營造司慶豐司及管理三旗銀兩莊頭處書吏一併陸續裁汰仍俟五年役滿照例考試後分列等第咨送吏部辦理即令退卯毋庸另行招募接充其應繕文稿等件亦令各該司司員等挑選能以書寫之栢唐阿等繕寫以歸畫一

移會陞遷事宜

凡京外文員武職陞遷降調議叙由內務府辦理者於具題引見後交都虞司轉交三旗參領飭令該佐領管領開列職名並具題降旨陞補日期遇有患病丁憂事故者俱由該佐領管領具保移送鴻臚寺帶領謝恩

咨送考語

凡各部院於引見之前期咨取內務府陞轉及稅差之官員考語並內務府行走之八旗官員等考語據咨呈明擬定考語咨覆

凡文職官員有無事故俱關銓選務於三日內咨覆如不能限內咨覆亦卽詳細查明於保片內聲明先行送部查辦如有遺漏遲延有悞銓選者卽將出具保片之該員移送兵部照例議處

咨送考試

凡牲丁子弟有情願考試者呈明咨送各該旗轉行該部令其考試

凡內務府三旗考驗考試人等馬步騎射嗣後俱交三旗值月副參領等預期將考試人等驗看如有事故呈報辦理考試事務處

凡看守熱河園庭官兵及莊頭園頭子弟如有情願考試生員者由該總管就近驗看騎射彙送考試錄送學政其取進額數應行設立廩增以及出貢年分一切事宜悉照禮部定准駐防考試章程辦理

道光九年六月本司呈准嗣後本司所屬冷口居住鷹手他坦達等子弟內有情願考試者即報明本司查對家譜丁檔內有名即交參領處轉交該佐領下辦理咨送考試

議叙事宜

凡內務府總管大臣等遇有應行議叙之處都虞司開寫職銜咨送吏部官員應行議叙者查例呈明議奏

凡內務府官員應行議處者移覆慎刑司查例議奏

咨取看守護送兵丁

凡看守各該處工程錢糧以及護送出口各項錢糧物件並起解人犯應用八旗官兵綠旗兵丁轉咨兵部撥給

呈送逃人

凡都虞司所屬牲丁內有逃走者照各該催總呈報咨送刑部

凡牲丁等與民人控告地畝由司呈明派員會同地方官辦理移咨戶部給與劄付

凡民人拖欠牲丁等地租銀兩呈明移咨戶部令該處解交

咨送查覈

凡各該處應領米石員役將實領米數造冊並原稿於下月初十日內一併移送查覈

凡各該處由倉領過黑豆麥子隨同米石一體造冊並原稿俱於下月初十日內一併移送查覈

凡所收一切案件摘敘事由將何日收到之處填註明確鈐押印信於三日內移送都察院衙門以備照案磨對

凡各院各司等處將每日所收發事件摘敘漢字事由註明日期並將移會何處之處造具印文於三日內送稽察內務府事務監察御史衙門查覈

道光二十二年十二月奉上諭給事中韓椿奏請將稽查領項明定章程一摺著內務府大臣會同三庫大臣詳細覆議具奏欽此 二十三年正月本府會同三庫大臣議覆奏

准嗣後凡內務府所屬各等處於應領戶部三庫銀兩緞匹顏料等項於每月十五日以前將上月內務府等處實領過銀兩緞匹顏料款項數目由承領處逐款分晰註明月分造冊知照三庫由各該庫覈對與上月所領之款項數目如俱相符卽於是月月終備文咨覆內務府呈堂存案儻有不符之款卽時行查呈堂覈辦其三庫領用內務府款項亦照此辦理

隨任子弟挑差

乾隆五十年奉上諭從來滿洲世僕原以侍衛栢唐阿係近御差使視爲榮耀於揀選侍衛栢唐阿甚屬情願今觀在京城文武大臣外任大臣官員之子弟每在各館行走或謀捐納文職官者較多且牢隨伊父兄任所竟不願挑侍衛栢唐阿者尤多於是挑取侍衛栢唐阿時不但乏人及其成丁竟不充當正項差使久在外任並不學習清語騎射技藝竟至廢棄滿洲舊業矣皇祖年間卽行查辦一次今在京文武大臣外任大臣官員均沾朕厚恩得項較多尙屬殷實其成丁子弟尤當挑取侍衛栢唐阿宣力奮勉始合滿洲世僕之道曾經降旨命軍機大臣詳查開單進呈經朕指出年已及歲者卽行帶領引見但

年未及歲者若不定限查辦相沿日久其舊染習氣必至復生著交八旗將現在指出隨
在外任年已及歲人等即刻咨取到時帶領引見外嗣後著該旗五年一次照此查明送
至軍機處彙辦請旨具奏再前次准外任大臣官員等奏請隨任一人幫辦家務即朕曲
盡施恩藉此儘其所有子孫俱留隨任是何意見嗣後著交八旗嚴行查察伊等子嗣內
年已及歲者只准奏請一人留於任所幫辦家務其餘年已及歲子弟兒孫等全行催令
回旗以備挑補差使儻有瞻徇不行催取將該都統等一併治罪通諭八旗各省永示遵
行欽此 道光二十二年四月奉旨內外大臣官員等子弟向遇五年查辦一次挑選侍
衛栢唐阿嗣後如遇挑選侍衛之年大臣官員子弟著毋庸列排欽此 咸豐元年二月
奉旨從前每屆五年一次將內外大員子弟查辦以侍衛用自道光二十六年查辦後又
屆五年惟思該大臣子弟內或身體軟弱騎射生疎或自幼讀書未能兼習騎射似此等
者即用爲侍衛焉能得力自應稍爲變通嗣後在京文職三品以上武職二品以上在外
文職自總督至按察使武職自將軍提督至總兵之子弟內及歲時呈報該旗造冊咨送
軍機處彙奏帶領引見儻身體軟弱騎射生疎即著該大臣據實呈報該旗轉行軍機處

勿庸備挑以示朕教育旗人至意欽此

親老改補事例

凡月選官員應由督撫給咨者該員於親供內將現存祖父母父母開明實在年歲令地方官加具確實印結送部存案不由督撫給咨者令出咨衙門及該員所取同鄉京官印結將現存祖父母父母開明實在年歲送部備案如遇具呈親老查其所開年歲於赴選親供及出咨衙門並同鄉京官印結內開載相符令該地方官加具印結俟該督撫覈明咨送到部查明具奏准其改補如有行查原赴選親供開註年歲不同將原詳請咨之地方官並出咨衙門及出結之同鄉京官照例分別議處 乾隆四十九年奉上諭嗣後各旗文武官員如有父母年至七十五歲以上者均不保送外任欽此

凡現任及試用人員遇親老八十以上及獨子之親年七十以上者通飭自行呈明聽其終養至現在外任旗員有呈請終養者未便令其在家閒居應照候補候選旗員親老改補以對品京職補用

成造担簦

宮殿等處每年應用野雞尾担帚所需木柄移付掌關防管理內管領處領取交密雲縣及冷口等處鷹手成造

出口人員領票

凡內務府各衙門奉差出口之官員人等據該衙門將人馬器械數目移會都虞司轉咨兵部領票

恩豐倉值年官員

凡值年司官一員內管領一員於二年期滿奏請更換再值年筆帖式二員亦於二年期滿更換

除派看賞人員

凡歲除領賞之王公大臣俱令各帶家人齋領並將應賞之物於內務府庫使護軍內每分酌派一人令其照管看守押送出門

應用蘇拉人役

乾隆二十三年奏准都虞司每年熬蜜十日每日用蘇拉一名

三旗參領事宜

建立公廨參領佔用員役

初三旗各設參領五員辦理該旗一應事務 雍正四年十一月奏准每參領各鑄給關防一顆令其輪班值月辦理該旗事務 乾隆十五年十二月本府奏准查八旗每一參領額設副參領一員今內府三旗參領員缺於本府司員內揀選帶領引見補放令其兼任參領其現在參領十五員俱改副參領令其協同辦理遇有值班出外等項行走差使專令副參領等承任 十六年正月呈准內府三旗參領設立公所每旗揀選諳練事務驍騎校一員領催五名辦理文移檔案每佐領管領下各挑取披甲人一名聽事傳差每旗各挑取披甲人二十名

看守湯泉等處行宮弁兵錢糧

乾隆二十三年十二月准東陵內府總管奏准查湯泉行宮係園戶看守離京甚近所食錢糧俱在佐領管領下領取毋庸置議外其看守南石槽懷柔縣密雲縣羅家橋瑤亭等五處行宮內圍委署千總兵丁每月所食錢糧停其來京由本佐領下支領嗣後亦照盤

山等七處並三家店行宮兵丁支領錢糧之例自己卯年正月起由湯泉總管處將一年應支錢糧數目造具細冊咨呈東陵內府衙門由該衙門出具文領派該處千總赴戶部領取收存該總管處按月支放

領取內班弁兵飯食銀米

乾隆二十一年六月本府奏准紫禁城內值班章京兵丁人等每日所食官飯折支銀兩

每月由廣儲司銀庫支領每日紫禁城內進班章京九員

每日每員分例銀三分四釐細老米五倉合

領催二

十八名披甲人一百五十三名共一百八十一名

每日每名分例銀一分二釐細老米五倉合

二十三年四月

本府奏准按照應領分例銀數得給錢文嗣後每日紫禁城內進班之章京每人得給大制錢三十文驍騎校護軍校筆帖式護軍每人得給大制錢二十文領催驍騎兵丁等每人得給大制錢十文 嘉慶十八年十一月奉旨酌增值班官兵銀米每人每日加米三合加銀一分欽此

整齊防火器具

乾隆二十三年都虞司呈准三旗各佐領管領下共設激桶一百三十架內除各處佔項

激桶二十三架外所餘激桶一百七架水桶二百十四副均屬齊全本司復查無異嗣後此項激桶水桶等項即著派值月參領等接代報司查驗如有應行修理之處交營造司修理整齊預備

賞給熱河總管養廉

嘉慶二十一年十二月奉旨嗣後熱河總管二員每年著加恩於武官賞銀內各賞給銀二百兩作為養廉以資辦公欽此

賞罰功過

嘉慶二十一年十一月准吏部議定嗣後在京部院衙門辦事司員遇有過失有奉特旨記過一次者予限半年限內並無過失准其查銷如未經查銷之先再有特旨記過一次者議以罰俸半年若係尋常過失由該堂官記過一次者予限三個月二次者予限六個月三次者予限九個月限內並無過失准其查銷記過至四次者議以罰俸半年如有多者按數遞加 道光十三年九月吏部遵旨酌議奏准嗣後如有遺失印鑰鑰牌之案即將遺失之員從嚴議以降一級留任不准抵銷遇有應行陞轉之缺槩行停其陞轉三年

無過方准開復其僅止遲誤請領印鑰並無遺失情事者仍照原例罰俸一年

官地被災定例

道光十年七月本府奏准嗣後內務府所屬莊園人等承種官地遇有歉收仍照嘉慶四年以前民地被災之例辦理一分至四分不准減免錢糧旗民地畝毗連若有虛捏妄報等弊別經發覺不但將該莊園人等從重治罪並將不實力詳察之地方官嚴參示懲

旗員告假

道光五年七月八旗都統會議奏准旗員兵丁告假出境等項章程

一官員兵丁告假及私自出境均照舊例辦理外所有閑散告假無論前往何處但令照例報明佐領告知參領註冊由佐領給與圖記即准外出營生該參領隨時呈明都統存案年終彙咨戶兵二部其回京不必勒定期限如在外有事逗遛准其報明地方官行文該旗回京之日仍准挑差儻出京已逾一年並無地方官展限文書到京即行銷除旗檔在外年久願改民籍者照漢軍例呈明該處地方官改入民籍其降革休致之官員已退錢糧之兵丁未食錢糧之舉貢生監均照閑散例一體辦理

一旗人犯竊即行銷除旗檔如罪止笞杖免其刺字改入民籍之後再犯罪至徒流以上者再行刺字逃走初次或實因病迷仍准投回挑差如逾限一月後無論投回拏獲及二次逃走者均行銷檔若官員逃走一次即行革職銷檔旗人登臺賣藝有玷旗籍免其發遣治罪連子孫一併銷檔

一八旗滿洲蒙古當年人少此時人多馬兵步甲尙准挑充何妨先予小官試之民事漢軍本有考職捐職之例百有餘年並無格礙官小易就出京者多於生計大有裨益今滿洲蒙古舉貢生監中不乏品學兼優諳練民事之士均照漢軍之例一體准其考職捐職

一各旗滿洲蒙古原有屯居之例如近京併盛京等處有地畝可種者准其告假自往清查如願自種准其呈明遷徙居住

新定火班章程

嘉慶二十四年十一月步軍統領衙門內務府會議奏准擬改紫禁城內火班章程

一宮內遇有傳用之時總管太監遵旨啓放何門傳知值班之奏事處官不分晝夜或由

乾清門或由內右門轉傳侍衛班領傳知該班官兵齊集候各該管激桶之大臣官員管帶方許進內是日值班之前鋒統領護軍統領在啓放之門專司稽查進門之時報明管門大臣某人帶領官幾員兵幾名管門大臣覈對相符方准放入出門之時仍照原報數目按名放出

一向來滿漢文武大臣官員俱應即時齊集惟入內人數過多轉致嘈雜未必得力應請旗員一二品大臣到門報明管門大臣不必奏明俱准放入其旗員三品以下漢員一品以下俱不必前往儻有私行混入者官員據實參究兵丁嚴拏治罪內庭行走之御前侍衛乾清門侍衛及大門侍衛值班者不得擅動不值班者准其進內一同彈壓仍酌留四人在啓放之門幫同管門大臣一體稽查其餘官員惟步軍統領衙門官員內務府官員左右翼翼尉協副尉步軍校諳練撲救者投遞職名即帶所屬兵丁進門其餘各衙門官員一概不准放入

一步軍營八旗激桶仍照向例預備於東華門西華門神武門外候信傳開何門卽趨何門責成該管大臣認識章京章京認識兵丁不必發給腰牌報明管門大臣放入

一火班尋常該班兵丁向例由內務府發給腰牌應再預設木牌一面載明官幾員兵幾名以便出入覈對

一紫禁城內向有朱旗房三十二處每日值宿內務府驍騎副參領二員章京領催十員名披甲人一百六十九名火班披甲人二十名此項披甲人向於三旗新陳鎗營內擇其技藝嫻熟者派撥總管內務府大臣等現已飭令該營參領於下班之日擇其年力尤爲強壯者一百名於操演技藝後演習激桶再於內務府三旗額設激桶一百三十架內擇其妥固整齊者八架添設於東華門內東北角閒房三間內四架添設於西華門內筒子河舊有朱旗房三間內四架派撥章京披甲人看守仍責成東西值宿之副參領分界管轄儻有傳用之時按進班披甲人分撥一半在原該班處所看守其餘會使激桶之披甲人等令該管副參領該班章京帶往應用並令嘉慶十八年添設進班之內務府護軍四十名一體襄事

一內務府額設激桶除各處佔用外餘俱分存新陳鎗營以備在營之披甲人等演習儻有傳用之時各旗披甲人均赴本營每二十人激桶一架每激桶一架或副參領一員

或佐領或內管領一員頂戴領催一名管帶到門報明管門大臣放入並請於東華門西華門外空閒大連房內各安設內務府三旗激桶四架每日派副內管領一員驍騎校一員頂戴領催二名每旗各選擇會使激桶披甲人四十名蘇拉四十名共八十名東西分班值宿按各旗進班之日更換每日在內務府衙門及值宿之內務府護軍統領處呈遞報單儻有應用之時內務府值宿之大臣告知管門大臣即傳此項官員兵丁帶領激桶到門先行放入至此項添設官員每員每日應得菜蔬折價銀二分披甲人蘇拉每名每日應得菜蔬折價銀一分無庸動支正項卽由淺斤加價銀兩內發給一紫禁城內內務府各司各庫所管處所較多均有責守必須令該管司員等進內方無貽誤若一槩准其放進未免人數衆多除內務府堂郎中堂主事堂筆帖式都虞司官員驍騎營官員內管領副內管領番役道上蘇拉等各有應行傳喚督催董率防範之責准其在啓放之門投遞職名放進其餘各處官員筆帖式等一槩不准放入一紫禁城內儻有傳用激桶之事距各庫切近者應令各庫官員司庫報明管門大臣投遞職名進內在本處看守防範

一圓明園步軍營向設激桶八架巡捕營向設激桶四架今擬巡捕營再添激桶八架應即將此激桶二十架分於各門附近堆撥存收設遇奉旨啓放何門仍由總管太監傳知值班之奏事處官不分晝夜由左門轉傳侍衛班領傳知步軍統領衙門朝房步軍營每激桶一架用步軍校一員步甲三十五名責成該班之副翼尉辦事協尉副尉管帶巡捕營每激桶一架用千總一員把總一員兵三十五名責成中營副將參將都司守備管帶齊集啓放之門住班之總兵報明管門之大臣章京投遞職名帶領入內並責令是日值班之散秩大臣專司稽查

一圓明園八旗包衣三旗均有翊衛之責自應一體敬謹預備查圓明園八旗每旗原各設激桶二架各派護軍校一員管理會使激桶護軍各六名挑水披甲各十名跟隨護軍校各二員護軍各十八名包衣三旗原各設激桶一架派護軍校一員管理會使激桶護軍四名挑水披甲四名跟隨護軍校一員護軍四名如遇應行傳用應再派下班參領各一員管帶如參領不敷用委參領一員管帶此項官兵各在本旗預備設遇奉旨傳用仍由奏事處傳知侍衛班領轉傳該班大臣令各旗印房各堆撥迅速遞傳齊

集候信俟奉旨啓放何門即將人數報明管門大臣投遞職名放入

一如遇皇上進宮圓明園有應行傳用之處總管太監知會在園值宿之大臣並住班管理園庭大臣轉傳如遇皇上駐蹕圓明園宮內有應行傳用之處總管太監知會該班之王大臣轉傳如遇皇上巡幸總管太監知會值宿之留京王大臣轉傳宮內由是日值宿之前鋒統領護軍統領在啓放之門專司稽查六班王大臣管帶官兵隨時撲救城內居住之滿洲一二品大臣仍許放入圓明園由是日值宿之散秩大臣在啓放之門專司稽查值班之管理圓明園八旗王大臣管帶官兵隨時撲救一切稽查出入俱照現議章程辦理

一備用兵丁責成各該管官平時勤加演習務令熟練並嚴加查察不得有假冒頂替等弊其應用激桶器械除內火班向由內務府修理外其圓明園應用器械各該處自行修理

一圓明園內務府三旗新健營每營擬各添設激桶二架各派前鋒參領一員前鋒校一員藍翎長一名前鋒二十名披甲人三十名在本旗預備皇上駐蹕圓明園設遇傳用

仍由奏事處傳知內務府堂住班處轉傳如遇皇上進宮或巡幸內庭主位仍在圓明園由總管太監傳知內務府堂住班處轉傳如遇皇上內庭主位俱進宮由總管太監知會住班之管理園庭大臣轉傳該營護軍參領傳齊官員兵丁啓放何門卽由何門報明管門大臣投遞職名放入等因奉旨英和等會議火班章程依議設遇中一路有傳用之時東華門西華門神武門俱著開放餘則與何門相近開放何門朕在圓明園責成前鋒統領護軍統領如巡幸在外責成留京辦事王大臣及前鋒統領護軍統領所有應行入內之大臣侍衛官員兵丁無論何衙門隨到隨放大臣等自酌數人分往稽察閑人該班之領侍衛內大臣內大臣並酌派侍衛數員一同稽察有不應進內混入欲行偷竊者立時拏獲問明隨何衙門混入將其人交刑部治罪並將誤行帶入之員議處欽此

欽定總管內務府現行則例

都虞司卷四

侍衛應得馬錢

道光七年四月准戶部文開嗣後內務府三旗遇有中式武進士補放侍衛者若係滿洲蒙古之人歸入旗侍衛卽照例支領馬錢等項若係漢軍之人歸入漢侍衛卽不應支領馬錢等項 十六年六月准戶部文開領侍衛內大臣處會同兵部奏准嗣後滿洲蒙古人員由武進士挑取侍衛歸入漢侍衛之例一體銓選均不支給馬錢

事故兵丁扣抵餉銀

道光七年六月准戶部文開酌議扣抵餉銀章程

一八旗兵丁按月餉銀定例上月十五日過檔本月初一日開放凡兵丁病故在過檔以後者入檔錢糧例准支食病故在未經過檔以前未及裁汰以及過檔後未經開放以前遇有革退逃走事故入檔餉銀例不應支領者俟領出時即將銀兩存收各旗營庫內於下月造支餉冊內聲明照數扣抵

一兵丁初借庫銀定例上月二十日以前過檔左翼四旗於本月初九日開放右翼四旗

於初十日開放凡兵丁病故在過檔以後者入檔庫銀准照餉銀之例一體關支仍入於寬免案內辦理病故在未經入檔以前及裁汰以及過檔後未經開放以前遇有革退逃走事故入檔庫銀例不應支領者俟領出時即將銀兩存收各旗營庫內於下月造支庫銀冊內聲明照數扣抵

一兵丁找借庫銀凡遇病故革退逃走在過檔後未經開放以前入檔找借庫銀例不應支領者俟領出時即將銀兩存收各旗營庫內於下月造支庫銀冊內聲明照數扣抵

一官員隨甲錢糧侍衛栢唐阿等馬銀馬錢向以每月初一日爲準分別扣支如在初一日未經開放以前遇有陞遷外省及降革事故入檔隨甲錢糧馬銀馬錢不應支領者俟領出時即將銀錢存收各旗營庫內於下月造支應領銀錢冊內聲明照數扣抵

一八旗閑散宗室覺羅以及八旗官兵栢唐阿等凡遇緣事送部應行扣餉者俱以宗人府刑部及各該旗知照到部分別扣繳各衙門向係結案後始行知照於本部辦理覈扣餉銀事件未免遲延應咨呈宗人府並移咨刑部嗣後遇有閑散宗室覺羅以及官兵栢唐阿食餉之人緣事送部卽行知照本部以便分別扣餉仍令各該旗嚴飭該管

官凡遇官兵緣事送部卽於俸餉檔內聲明停領俟完案之日再行分別扣支

一入檔告假出外官兵各旗營有以原給假限報部停餉者有俟該官兵回京時報部分

別有無逾限者殊未畫一嗣後總以原給假限爲準如逾原給假限未回卽於俸餉冊

檔內聲明停領俟該官兵回京之日報部由部覈計往返程途有無逾限分別扣支

一挑取各部院衙門當差食餉官兵栢唐阿等各旗營造送錢糧檔內不分晰註明何處

當差字樣嗣後應令各該旗營於造支錢糧冊內詳細註明在何衙門當差字樣以便

查覈

一現食鰥寡孤獨錢糧人等各該旗造支餉冊內有註明年歲者有不註年歲者食週年

半餉之孀婦有註明起支年月者有不註明者殊未畫一嗣後應令各旗佐領將食餉

之鰥寡孤獨並支食半餉人等於餉冊內逐名填註年歲併起支餉銀年月以備稽查

酌給水手子弟錢糧

道光六年三月本府議覆奏准昆明湖戰船二隻現均裁撤原設有實缺千總三員委署

千總四員委署把總四員水手四十名其實缺千總三員每年各食俸薪養廉馬乾共銀

一百九十一兩九錢九分八釐仍准照舊支食原餉等項與委署千總四員委署把總四員均撥在昆明湖輪流看守交巡捕中營將官管轄不佔巡捕營之缺遇有缺出卽行裁汰其委署千總四員每月各食錢糧銀二兩九錢米六斗准其照舊支食原餉查御船處水手九十三名每月各食錢糧銀一兩五錢米一石奉宸苑外河閘軍七十九名每月各食錢糧銀一兩並無米石以該二處水手閘軍各出一缺補用該委署千總一人俟補用水手閘軍後再行裁汰原餉如遇有事故出缺卽將水手閘軍之缺以該弁等子弟按缺挑補仍歸本處當差以符原額其委署把總四員每月各食錢糧銀二兩一錢七分五釐米六斗亦准暫食原餉查奉宸苑裏河閘軍三百十九名清漪園等處閘軍一百七十一名每月各食錢糧銀一兩米五斗俟該二處閘軍出有二缺充補該委署把總一人俟補閘軍後再行裁汰原餉該弁等遇有事故出缺將閘軍之缺卽以該弁等子弟按缺挑補仍歸本處當差以符原額其水手四十名每月各食錢糧銀二兩一錢七分五釐米六斗仍食原餉分撥奉宸苑清漪園等處當差俟該二處閘軍出有二缺充補該水手一人俟補閘軍後再將原餉裁汰該弁等遇有事故出缺以該弁等子弟按缺挑補卽在本處當

差以符定額其昆明湖迤西原設有該員弁等居住官房一百二十六間向係健銳營經理今將此項房間仍令該員弁等居住卽交靜明園官員經管遇有坍塌無庸官爲修理令其自行修葺並著該管官員不時稽查勿致拆毀以專責成 七年十月本司呈准所有昆明湖裁撤弁兵如在未補闈軍以前遇有事故出缺卽交奉宸苑清漪園等處查明如有闈軍之缺將該弁之子弟先行扣補嗣後均照此例辦理其實缺千總三員除陞轉外遇有事故出缺卽報明都虞司轉行奉宸苑清漪園等處亦將該千總之子弟酌量補放闈軍錢糧以歸畫一而昭公允 二十三年五月奉宸苑咨稱前由內務府奏准將裁撤水師營之水手分撥本苑佔用闈軍現在本苑奏裁闈軍一百二十九名若仍照舊章不敷充補所有未補闈軍之水手及伊等子孫嗣後毋庸充補本苑闈軍之缺

巡幸監射布靶

嘉慶二十五年五月奉旨嗣後派出隨圍之提督衙門協領綠營都司以上官員內務府七司三院官員俱著毋庸在朕前射布靶著派出之王大臣監射欽此

引見事宜

嘉慶二十三年十二月奉上諭向來吏兵二部引見人員俱於次日述旨其有應行謝恩者於再次日具摺謝恩其銓選各部院有述旨者有不述旨者即如昨日值年旗帶領總管城守尉各員引見本日並未述旨該總管等即各具摺謝恩辦理殊未畫一嗣後文武各衙門帶領引見俱著於次日一體述旨其應行謝恩人員於再次日具摺謝恩著爲令欽此 道光四年十一月奉旨各部院衙門引見人員進乾清門時自應執事人員隨入其餘不准擅入昨日引見人員進內時有鑲紅旗藍翎長明海隨衆同入乾清門殊屬不曉事體有干法禁明海著卽照御前大臣所參重懲革退藍翎長失察之該管護軍統領晉登額著交部議處乾清門該班章京景式亦著照所奏罰俸三個月嗣後各部院旗營引見人員進門時著各將應行進內人數開單預送管門大臣以備查覈如仍有率行濫入者一經查出務必從重治罪決不輕貸欽此 二十八年十二月奉上諭門禁例應嚴肅道光四年曾經降旨申諭總因日久懈弛視門單爲具文或不繕送或繕送而不覈實稽查以致有人混入著再行申禁嗣後部院各旗營各衙門引見人員進內仍遵前降諭旨認真查辦不得視爲具文儻再有悞入禁門之事定將各員從重懲辦決不寬貸欽此

鄉會試事宜

道光十二年閏九月奉旨前據那清安等奏參該旗官卷送考冊籍錯誤請將佐領參領議處當降旨將嗣後例編官卷應如何詳慎稽察不致列入民卷並送考冊籍不致遺漏錯誤之處交禮部妥議具奏茲據查明覆奏順天府歷屆鄉試試卷均係照例辦理立法本極爲詳備此次錯誤實由該旗送考冊籍漏填官卷以致誤入民卷取中嗣後旗人應文鄉試者著各該旗照例將應編官卷各生履歷詳細造冊一面咨送順天府辦理試卷一面咨送禮部以備查覈其參佐領等官承辦造冊與外省事同一律嗣後各該旗遇有應編官卷由本家呈報佐領由參領詳加查覈造冊送順天府後其試卷應註明官字如有混入民卷取中者比照各省辦理官卷朦混出結及朦混造冊各員處分例查係本家漏報將本官革職本生黜革查係佐領漏報將該佐領降二級調用並將不行詳查之參領降一級調用如墨卷本有官字硃卷漏印官字戳記將承辦之員降一級調用均著照所議辦理其各該旗都統副都統於參佐領辦理送考冊籍均有稽察之責儻例編官卷遺漏錯誤俱有應得處分嗣後應如何處分之處仍著禮部議奏欽此是月奉旨前據

禮部議覆各該旗參佐領辦理送考冊籍遺漏錯誤嗣後比照各省辦理官卷各員處分例業經照議辦理其各該旗都統副都統等均有稽察之責儻將來應送冊籍有遺漏錯誤之處自應予以處分當降旨仍令禮部議奏茲據奏稱嗣後八旗滿洲蒙古漢軍及內務府儻於例編官卷遺漏錯誤該都統副都統總管內務府大臣失於查察請比照外省巡撫學政失於查察例罰俸一年著照所議辦理欽此 二十六年十二月禮部咨准嗣後每屆鄉會試年應照不准更名之例凡舉貢生監俱不准其改籍出繼復姓歸宗俟鄉會試竣再行照例辦理 二十九年四月禮部奏准嗣後應試生員編入官卷章程凡休致官員內有由該員自行具摺陳請無論告病告老奉旨休致者以乞休論准其編入官卷其不由該員具摺陳請奉旨休致者無論京察之年或平時奉特旨者概以勒休論至休致武職雖奉旨在籍食俸惟不由該員具摺奏請者亦以勒休論均毋庸編入官卷再署事之員如本缺原應編入官卷或服滿後或降級革職後奉旨署理他缺仍在應編官卷之例者一體編入官卷

道光十三年三月戶部議准嗣後在京文武大臣奉旨差往各省查辦事件旋即派署督撫總以接任卸事日期爲斷如接任卸事日期在一月以內者停扣一個月隨甲錢糧在一月以外者停扣兩個月隨甲錢糧仍按月將隨甲錢糧入檔聲明停領統俟該大臣回京之日咨查該省接任交卸日期再行分別應扣應領報部覈辦至由京奉旨派署督撫各篆其應支隨甲錢糧仍照舊案辦理

遞奏事宜

道光十三年六月奉上諭前因奏事處率行接收不識姓名人擅遞封章降旨將哈朗阿等分別降調降留並令御前大臣軍機大臣會同妥議章程茲據長齡等詳議具奏嗣後奏事官接收奏章宮內辦事之日著於寅刻在內左門外九卿值班房接收圓明園辦事之日在出入賢良門外朝房內接收如遇臨幸各處即在該處宮門外朝房內接收每日接遞之際著奏事官先接尋常摺奏再接封奏務當逐件詳慎檢明其聯銜封奏及尋常摺奏均著各衙門出具印片交該遞摺官員等隨摺交奏事官以憑覈對至單銜遞奏封章者自親王以至御史均著親身呈遞該奏事官如有查明匿名奏章及形跡詭詐實在

可疑之人除將呈遞之件存留一面指令黏竿處該班侍衛等將遞事之人嚴行看守一面回明御前大臣查明奏辦儻奏事官無故吹求有將奏摺應接不接者即著呈遞之人回明御前大臣參辦欽此

議奏事宜

道光十四年七月戶部遵旨議奏各關監督虧缺正額銀兩欠不及半分者改爲降二級調用欠半分至一分以上者降三級調用欠二分以上者降四級調用欠三分以上者降五級調用欠四分以上者革職仍照舊不再計盈餘處分其分賠著追年限仍遵照道光十一年八月奏定章程辦理等因一摺奉旨依議欽此 二十七年五月戶部奏准嗣後賠交關稅各員於限內交至七成以上者屆限免其革職監追其未交之二成有零另作分數予限完清有官者即以廉俸全行坐扣俾賠款悉歸有著

滿洲臣僕俱應通曉清文

道光十五年六月奉硃諭朕因滿洲侍郎以下至五品京堂人數衆多其能否通曉清文未能槩知是以特命分日進內考試其繙譯通順及能繙而錯誤者不過十之三四竟不

能落筆者過半焉此則甚屬非是清語乃滿洲根本並非分外之事無論何項出身俱應熟習况辦理部旗諸務皆有清文事件若不通曉將何異於漢官豈止爲人所笑不有忝於乃祖乃父耶嗣後我宗室覺羅暨八旗臣僕勤修本業勉紹家聲斷不可不曉清語不識清字以副朕務本成全諄諄誥誥之至意將此通諭知之慎勉毋忽特諭欽此

考察官員

道光十五年閏六月奉上諭國家分設部院大臣紀綱庶務全在振興人才欲剔弊釐奸必勤勤懲惰舉錯公允則英俊既資造就而中材亦可奮興賢否混淆則庸碌藉可藏身而才能亦生退阻各部院司員人數衆多豈能盡皆稱職之人全在各該堂官留心考覈隨時試其能否勉廸兼施儻有衰庸不職者溷迹其間自應隨時甄別不得稍事優容前據御史許球奏請澄汰司員以重部務當降旨飭令各該堂官秉公察覈旋據各部院將衰庸不職者或一二員或三四員陸續查明據實參劾均經照議准行嗣後遇京察之年固當考其勤惰第其賢否舉劾並行以昭激勸即在平日於各司員之賢否勤惰秉公覈實隨時察看其有闕冗無能怠惰自安者一經查出即行據實參劾斷不可因此次甫加

甄別遽示姑容又蹈因循故轍以副朕勤求治理整飭官常之至意欽此 十六年十二月准吏部咨稱所有京察扣俸日期外任旗員因親老改補京職者應以補缺之日起俸丁憂回旗人員奉旨內用者應以內用之日起俸至實授後統計歷俸已滿三年一體准其保送京察一等 十七年二月吏部奏准凡外官因不勝任改用京職原係外官奉旨以京職改補不勝倉差咨回原衙門行走俸滿保送簡缺並保繁奉旨改簡及仍回原衙門人員俱不准保送京察一等其由京堂御史緣案降補以及原係京職降調補官指明以何官降補或仍回本任並廢員起用捐復降捐人員如係一體陞轉其原案內並無不勝外任及奉特旨停陞者查係計俸合例俱准其保送京察一等至各衙門揀發河工學習期滿回任人員與不勝外任者不同應由該堂官查係合例亦一體准其保送 二十六年十一月吏部奏准嗣後在京堂司各官遇有應行出考之處如到任未及三月者毋庸出考遇有失察之案如到任不及一月者免其議處

欽差大臣不准隨帶現任大員子弟

道光十五年十一月奉上諭嗣後欽差大臣查辦事件其隨帶司員不准以現任大員子

弟派往欽此

摺奏書稱

道光十六年三月奉上諭朕本日恭閱乾隆三十七年皇祖高宗純皇帝實錄內載內外各衙門題奏咨行事件凡遇滿洲蒙古人地名應譯對漢字者往往任意書寫並不合清文蒙古本音因而舛誤鄙俚之字不一而足於體制殊爲未協著交軍機大臣依國書十二字頭酌定對音兼寫清漢字樣刊成簡明篇目頒行中外大小衙門俾各遵守欽此聖訓煌煌允宜永遠恪遵近來內外各衙門疏章案牘於滿洲蒙古人地名清漢對音之字間有參差未能畫一自係奉行日久講習漸疎以致臨文書寫多有僞誤著武英殿即將清漢對音字式一書再行刷印頒發中外大小衙門嗣後遇有滿洲蒙古人地名對音之字一體凜遵定式查照譯寫不得仍前舛誤以歸畫一而昭法守欽此

責令筆帖式繕寫清文

道光十七年二月奉上諭給事中清長奏請責令筆帖式繕寫清文一摺各部院所設筆帖式職司繕寫清文原不應假手於供事書吏若如該御史所奏近來各部院衙門難保

無供事書吏代寫清文之事恭查嘉慶二十四年有永遠禁止諭旨自應欽遵辦理嗣後凡有清文事件應責成筆帖式繕寫以符體制並著各衙門查明此後如有代寫等弊該堂官據實參奏將失察之該管官員並僱倩供事書吏繕寫清文之筆帖式一併交部分別議處欽此

武舉選用門衛千總事宜

道光十七年十二月准兵部文開嗣後滿蒙漢兼任驍騎校護軍校等官之武舉如揀選一二等願分發巡捕營効力者應即辭退驍騎校護軍校差使由該旗報明本部方准給與驗票其漢軍一二等武舉及滿蒙漢三等武舉願以門衛千總選用者銓選較遲其初次投供時姑免開其差使惟赴選文結內該旗務將身兼何項差使聲明咨部俟屆應到班該武舉即應辭退差使本部行查時該旗即將開缺候選之處聲明如並不咨報開缺本部卽行扣選如三等武舉遇漕運掣發隨幫有情願赴掣者亦卽辭退差使一體具呈掣籤該佐領圖結內即將開缺之處聲明咨部如有未經聲明含混具呈者雖經掣得亦即扣除至前項武舉續經陞用五品旗職者斷難再任營衛千總亦卽隨時咨報本部以

備查覈

新建營改爲精捷營演習章程

道光十八年四月奉上諭禧恩等奏查閱三旗新建營步射技藝請酌改操演章程著派奕紀敬徵專管新建營事務並著妥議章程具奏欽此 是年閏四月具奏所有該營演習技藝之前鋒一百二十名每名拴官馬一匹向習解馬兼習長槍單刀今仍令演習解馬兼習馬上花槍將別項技藝撤去披甲人三百名向習鳥鎗雜技今令一百五十名演習長矛一百五十名演習單刀俱兼習步履捷法將鳥鎗等項撤去至該營官兵出缺仍照舊章辦理其一切事務向派堂郎中會同三旗護軍統領管理今既另立章程應將堂郎中撤去派護軍統領一員隨同辦理該營事務其餘兩旗護軍統領毋庸兼管以專責成其撤去鳥鎗火藥等項仍交城內鎗營以符原制至該營兵丁係由城內新陳鎗營分撥移居今既改立章程遵旨另擬營名等因一摺奉旨依議該營著賜名精捷營欽此

一每旗設長矛兵五十名單刀兵五十名初學之際令其逐日演習俟三個月後每月小操九次大操三次每年四季合操四次以技藝之優劣而定等第連次頭等者加給公

費酌予鼓勵其生疎者裁去公費加以鞭責學無成效者駁回本旗在附學幼丁內挑補馬上花槍亦一體辦理

一不論刀矛每十人爲一隊每隊內選一便捷精熟之人爲隊長演成合陣散戰各勢其進退步法開合皆遵本隊隊長指揮所向仍責成護軍校二員分領刀矛隊長專司稽查委護軍參領一員作爲營長管理操演馬匹護軍參領一員作爲營總管轄弁兵辦理本旗事務

一三旗操演技藝該護軍參領既爲營總應令分旗經理以便查其能否管轄如遇彙辦事件向無檔房公議處所事屬散漫擬立檔房一處令辦理該營事務護軍統領一員總辦由護軍營每旗揀派護軍校一員筆帖式一員隨同辦理三年更換將該營年例濫價公費銀二萬兩內每年按春秋二季每季領銀四千兩存收檔房以便放給官員兵丁公費教習工食及修理事械號衣之用年終由本營彙總奏銷以昭覈實

一向來演習解馬每旗本有附學幼丁十名每名月給公費銀一兩今披甲人演習刀矛擬每旗亦添附學幼丁十五名每名月給公費銀一兩披甲人缺出即可於附學幼丁

內擇其能者挑補且該兵丁等習慣規模較新挑初學之人教演尤爲省力庶不致年久廢弛

旗人命名

道光十八年六月奉上諭向來旗人命名如用滿洲蒙古成語自可不拘字數若有取漢文字義者祇准用兩字不可連用三字朕屢經降旨明白宣諭近來京外文武各員內仍有連用三字並非滿洲蒙古成語大屬非是著八旗都統副都統各省將軍都統副都統城守尉通飭所屬嗣後旗人命名務當查照歷次所降諭旨永遠遵行經此次飭諭之後儻再有連用三字文義不相連屬並非成語者一經查出定將該管之都統等懲處不貸欽此 十九年五月奉上諭前曾降旨旗人命名若取漢文字義者祇准用兩字不准連用三字其有取滿洲蒙古字義者如非成語亦不准用昨因鑲藍旗帶領引見盛京防禦擬陪之驍騎校命名慶豐阿殊屬非是當經更名慶豐著八旗都統副都統各省將軍都統副都統城守尉等再行通飭所屬嗣後似此滿洲蒙古並非成語及連用漢文三字者概不准命名欽此

考取筆帖式庫使等條例

道光十八年八月本府具奏請將考取候補筆帖式庫使人員仿照考取八旗筆帖式之例歸吏部辦理至入場之期由本府揀派識認官員在點名處所逐名識認其閱卷大臣應將總管內務府大臣銜名迴避等因一摺奉旨嗣後考取內務府候補帖筆式庫使人員著咨送吏部照考取八旗筆帖式之例辦理餘依議欽此 十九年三月吏部奏准考取內務府候補筆帖式庫使人員經內務府奏明仿照考取八旗筆帖式之例歸吏部辦理除庫使一項應照八旗考試庫使毋庸考試馬步箭外至筆帖式應請照例仍行造冊咨送兵部考試馬步箭後咨回吏部辦理以歸畫一 三十年四月奉上諭通政使司參議倭什琿布奏習清文以培根本一摺清文爲滿洲本業各旗士子自應習之有素據稱考試八旗繙譯生員向有各該旗考試後錄送之例嗣後凡遇考試八旗中書筆帖式繙譯官譯漢官該旗錄送時即照考試繙譯生員之例一體先由各旗佐領考試如佐領不諳清文即由參領考試仍俟都統副都統與查旗御史會考甄別錄送儻有冒名傳遞情弊立即嚴參懲辦惟不得日久視爲具文稍滋怠玩欽此

降調官員加級紀錄

道光十八年五月准吏部議覆查滿洲文職官員任內所得尋常加級紀錄於陞任後其加級應照例每級改爲紀錄一次俱准隨帶又部議降革隨本奉旨留任人員其加級紀錄准其隨帶其餘並非本案開復議革後降補他職或起用之官優於所降之級者原係獲罪棄瑕錄用其加級紀錄俱不准隨帶至降調官員照所降之級補官前任內所得加級紀錄例應准其隨帶 七月准兵部議覆凡陞任加級應改紀錄各官如係軍政卓異將卓異查銷加級一併改爲紀錄一次又降補官員所有前任內加級紀錄俱准其帶於降補任內若原任內有卓異加級應即銷除不准隨帶至軍政議降各官雖任內有軍功加級及各項加級紀錄均不准抵銷降補時仍准隨帶又職任兼世職等官有緣事革去職任仍留世職其由世職任內所得加級紀錄仍准其隨帶 二十八年九月吏部咨稱查定例京外大小各官議敘加級并著有勞績欽奉特旨賞加之級情願改爲紀錄四次抵銷罰俸者准其改抵如改爲紀錄之後抵銷過一次二次三次者陞任後概行註銷若在任時所改紀錄並未抵銷只准將紀錄一次帶於新任如恭逢覃恩所加之級不准改

爲紀錄四次抵銷罰俸等因其內務府人員向不列入本部官冊如有呈請加級改爲紀錄者即由內務府自行查辦等語隨經本府呈准嗣後本府文職官員請將加級改爲紀錄抵銷罰俸覈與例案相符者即由本府自行辦理

移會事宜

道光十九年三月奉旨刑部奏訊明書吏傅以宣誣騙得贓捏造白片一案各衙門遇有緊要公事不及用印原准先用白片知照仍聲明後補印片字樣現在吏刑二部既查出書吏私行白片之案自當申明舊章以杜弊端嗣後除尋常日行事件毋許擅行白片外如有緊急文件不及鈐蓋堂印應先行白片知照者仍於文後寫明後補印文次日即呈堂標畫補行儻遲至三日不補印文即由接到白片衙門行文查問以昭慎重餘依議欽此 四月奉旨據給事中張秉德奏戶部書吏王姓到庫領取銀硃等物在打磨廠小門該吏住宅搬卸刑部書吏鍾姓領取台連紙張等物在前門外西域牆永泰紙鋪搬卸顯有盜賣抵換情弊書吏王姓鍾姓著交刑部嚴行審訊嗣後在京各衙門赴庫領取物料著該堂官派委筆帖式司務廳等官帶領書吏赴庫憑文領取並著於領回物件時進署

當堂銷差以絕弊混欽此 二十五年六月本府奏准查會典內載六部理藩院都察院內務府各旗都統步軍統領衙門往來行文均用咨六部都察院行順天府用劄六部行太常寺太僕寺光祿寺鴻臚寺國子監欽天監太醫院各關監督各省鹽政織造均用劄行府廳州縣用牌文惟本府行順天府各寺監衙門各廳州縣應用何文會典內未經載明嗣後本府行文京外各衙門以及各廳州縣均比照六部體制鈐用堂印咨行其京外各衙門府廳州縣行文本府亦即遵照行文六部體制遵行以符體制

熱河園庭裁撤弁兵

道光十八年正月經欽差大臣文慶等奏准熱河園庭內外歸併處所分別擬撤官兵園庭十大處共設苑丞苑副千總等官十六員每月食二兩餉銀兵一百九十六名食一兩五錢餉銀兵二百九十七名食一兩錢糧蘇拉九十九名獅子圓及外廟各等處共設苑丞千總等官二十七員每月食二兩餉銀兵二十九名食一兩餉銀兵一百九十四名食一兩錢糧蘇拉二十九名現將園內月色江聲六大處及獅子園外廟等處陳設既議歸併其看管各該處官兵亦應酌覈裁撤除烟波致爽勤政殿如意洲三大處向設官兵照

舊看管外擬於月色江聲分下酌留七品副千總一員八品副千總一員兵八名裁去苑副一員七品千總一員八品副千總一員兵五十名瀑布分下之梨花伴月酌留七品副千總一員八品副千總一員兵二十名裁去苑副一員七品副千總一員八品副千總一員兵二十三名曠觀分下之文津閣酌留苑副一員七品千總一員兵二十名裁去七品千總一員八品千總二員兵二十七名含春齋分下酌留七品八品副千總各一員兵二十名裁去苑副一員七品副千總一員八品副千總二員兵三十三名西峪分下酌留七品副千總一員八品副千總一員兵八名裁去苑副一員兵二十三名芳園居分下之坦坦蕩蕩酌留苑副一員七品副千總一員兵二十名裁去七品副千總二員八品副千總二員兵三十二名永佑寺分下酌留苑副一員七品副千總一員八品副千總一員兵二十名裁去七品副千總一員八品副千總二員兵二十二名獅子園一處酌留七品副千總一員八品副千總一員兵十六名裁去兵十六名外廟十一處酌留苑丞一員六品千總四員七品副千總四員八品副千總八員兵一百十九名裁去六品千總二員七品副千總四員八品副千總二員兵七十名

禁飭服色

道光十五年閏六月奉上諭前經降旨閱看八旗兩翼兵丁步射朕思滿洲兵丁等技藝最爲緊要平日俱穿布衣方稱伊等本分斷不可徒尙虛文著曉諭該營此次預備步射人等俱著穿用布袍布靴儻仍有任意穿用綢緞者惟該營之前鋒統領護軍統領等是問欽此 十九年十月奉上諭前降旨令各旗兵丁射箭俱穿用布衣布靴毋許穿用綢緞以示節儉本日引見八旗兩翼官兵仍有穿用綢緞之人甚非朕崇實黜浮之意該管大臣著傳旨申飭嗣後前鋒校護軍校以下人員凡遇引見射箭時均著恪遵前旨穿用布袍布靴該管大臣尤當隨時訓誡崇儉抑奢務令技藝精嫻足備他日干城之選儻仍競尙浮華致荒本業除本身即行斥革外定將該管大臣一併嚴懲決不寬貸慎勿視爲誥誡之具文也將此通諭知之欽此